

(3)
DESIDERII
ERASMI

Roterodami

De

CONTEMPTU
MUNDI.

Liber.



LUGDUNI BATAVORUM,
Ex Officina IOANNIS MAIRE,
ANNO MDLXCLI.



3


DESIDERII ERASMI

Roterodami

DE

C O N T E M P T U
M U N D I.

C A P U T I.

 Lim quidem Iodoce
adolescens charissime
non mediocris mihi ad
te scribendi incessit cu-
pido, sed hactenus pu-
dore magis quam negligentia silui,
veritus scilicet ne te singulari tum
prudencia tum eruditione hominem,
ego admonere parans, ego inquam
natu quidem haud multo maior, cæ-
teris autem rebus longe inferior, aut
ululas Athenas, ut in proverbiiis est,
aut in sylvam lingua ferre viderer.
Non quod dubitarem quin tu, ut es
animo lenissimo optimoque, adhor-
tationem nostram in optimam par-
tem acciperes, sed ne ego parum mo-
desti viri officio functus viderer, qui

te admonere tentarim à quo me admoneri longe æquius erat. Quĩd igitur faciam? Scribam ne? At id pudor vetat. Sileam vero. At è regione id amor tui Iodoce non finit. Ergo ne perpetuo hærebit in dubio animus, hinc suadente amore, hinc dissuadente pudore? Verum ambiguo animo vix quicquam est molestius. Verum tandem vincat quod æquum est vincere, cedat amor pudor. Pluris mihi debet esse tui commodi ratio, imo tuæ salutis, quam alienæ de me opinionis. Quod si nostrum scribendi officium arrogantia magis quam prudentia dabitur, catenus certe peccato meo danda venia erit, quatenus ab amore (qui nihil consulte agere solet) profectum videbitur. Malui enim amanter scribendo audentius quam prudẽter tacendo prudentius agere. Nec vereor omnino ne hoc patrono (amorem nostrum loquor) absolvi nequeam. Neque enim aut simplex est aut vulgaris, sed & geminus & singularissimus. Maxime siquidem ac plurimæ necessitudinis

CONTEMPTU MUNDI. 5
nis tecum mihi causæ intercedunt,
mutui à pueris convictus, mira quæ-
dam animorum consensio, commu-
nia optimarum artium studia, innu-
merata tua erga me officia, denique
singularis & tua & tuorum in me be-
nevolentia. His omnibus etiam san-
guinis affinitas accedit. Quid autem
ea necessitudine potest esse copula-
tius, quæ quasi duplici catena colli-
gatur, hinc sanguinis vinculo, hinc
coniunctissima quadam charitate a-
nimorum? Itaque velim sic tibi mi
Iodoce persuadeas, neminem un-
quam sibi quam tu mihi es, fuisse
chariorem. Quando autem te æque
atque meipsum diligo, aut etiam
amplius, æquissimum est ut tua salus
non minori mihi curæ sit, quam mea-
ipsum, imo facit id (nescio quo pa-
cto) verus amor, ut acerbius amici
quam nostra incommoda doleamus,
eiusque commodi quam nostri simus
cupidores: denique (ut paucis dicā)
facit ut homo sit homini charior
quam ipse sibi. Quod equidem de te
sperare, de me plane affirmare possū.

Hinc mihi eam fiduciam sumpsi, ut modestię paulisper oblitus, hanc hortatoriam ad te epistolam scriberem, qua te plane à mundi strepitu commercioque abducere, atque ad monasticam, id est solitariam tranquillamque vitam transferre cupio. Res ardua, & quæ non passim vulgo persuadeatur, sed quoniam ea vitæ tuæ integritas est, ut iam nunc præter habitum (in quo mihi quidem gratulor) prope nihil suum in te mundus habeat, exhortationem meam non inane futuram confido, quandoquidem eodem te & optimi animi impetus, & nostra vocat oratio. Quis enim dubitat ei rati cursum esse facilitimum, quæ & ventis fertur & amne secundis? Quanquam autem in optimam spem tua me probitas vocet, nunquam tamen timere desinam, donec nequissimo isti & lubrico seculo valedixeris, atque ad cœnobium tanquam in tutissimum sinum te receperis. Quoties enim (crede mihi) discrimina in quibus tua vita versatur mecum petracto (id autē facio prope
semper)

semper) toties singularis tui amor
anxium me atque sollicitum reddit,
nec aliter afficior quam pia mater
quæ gnato unico, eodemque charis-
simo fretum aliquod crebris infame
nafragiis navigante, sævissi-
mum ventorum turbinem surgere
non sine lachrymis videt, palle-
scit, trepidat, æstuat, gnatum in
somnia cogitat, gnatum dormiens
somnia, semperque animo peiora
veretur, semperque timet gravio-
ra pericula veris. Atque utinam ego
non minora veris pericula timeam.
Sed novi ego, novi Iodoce novi,
quos istud seculi fretum habeat
motus, quæ vitæ pericula, quot mor-
tium genera, unde pridem scissa ra-
te vix exigua vehente tabula nu-
dus evasi. At tu forsitan ceu temere se-
curus timidiusculum me vocans se-
curum esse iubebis. Atque isto pa-
cto pectori nostro metum non exe-
meris, imo adauxeris, tantumque
abes ut securum præstiteris, ut spem
etiam nostram propemodum omnem
labefeceris. Tanto enim periculosius

discrimini pates, quanto minus intelligis, aut certe si intelligis non caves, nihil ista confidentia perniciosius, nihil dementius. Quid enim eo navita vecordius, qui inter spumantes aspergine scopulos, syrtes furentes, voracesque pelagi vortices tempestare sævissima, rate denique parum firma navigans nihil metuat periculi, sed ad gubernaculum resupinus cantitet, vectoresque suos veteresse sollicitos? Quis non eiusmodi hominis & temeritatem exhorreat, & incolumitati timeat? Neque ego mi lodoce prius tibi timere desinam, quam tu inquietissimum istud seculi pelagus defines temerarius navigare. Ridicula (inquies) comparatio. Quid seculi & pelago convenit, cum altero nihil sit blandius, altero nihil horridius? Imo (si propius intendere vacet) haud scio an ulla sit accommodatior. At tibi syrenum male dulces moduli, quibus præter-navigantes sopire, tumque mari mergere solitæ feruntur, male blandas seculi illecebras inepte videntur exprimere?

Quæ

Quæ utinam videas quos adolescentiæ tuæ laqueos, quos dolos, quæ retia retenderint. Harum igitur facilius fugias (fuga enim tutissima est) nec temere confidas istac te impune navigaturum, ubi fecisse naufragium vides David, Solomonem, itemque alios & plures & nobiliores, quam ut hoc loco commemorandi sint. Hoc breviter dixerim, Nemo pene evasit, nisi qui fugit. Ulysses (Homero auctore) qui sapientis perfectique personam gerit, syrenum istarum voces multo studio (ut qui cera aures opplexerit, seque malo rudente astrinxerit) vix effugit. Tibi porro quid spei est in cuius unius perniciem tot pariter res coniurarunt, ætas lasciviens, forma alliciens, opes, facultas, libertas, monstrorum denique istorum heu nimium dulcium nocturna diurna que carmina? Nec tibi minus metuendos censeo prominentes istos atque acutos scopulos, secularium dignitatum fastigia, in quos si te violentior flatus impulerit, pulchre se tibi res habebunt, si brevi

10 ERASMI ROTER. DE
tabula natantē in litus aliquod igno-
tum procella eiiciat. Quid charyb-
dium inexplēbiles voragines, quæ si
quam forte corripuere, ratem cur-
rentem sistere, atque crebrius in or-
bem actam absorbere memorantur,
num obscurum habēt avaritiæ simu-
lachrum? quæ insatiabili habendi
studio pectus exagitans nunquam si-
nit esse quietum, donec absorptum
barathro demergat. Nunc syrrium
furibundos æstus, indomitos irarum
impetus accipe, quarum istic tanto
copiosior materia, quanto offensa
crebrior. Quid venti? Nonne tum
assentatorum tum maledicorum ser-
mones pestiferos pulcherrime refe-
runt? Qui (nihil refert) unde flent,
perinde utrique timendi. Nam si se-
cundi, in asperrimas cautes puppim
præcipitem ferunt, sin adversi, nihil-
ominus in syrtes agunt. Et quid hor-
renda illa fluctuum alternatio, modo
ad sydera sese tollentium, modo in
seipsa residentium, quam apte fortu-
næ vicissitudinem varietatemque ex-
primit, qua plerumque fractus ani-
mus

CONTEMPTU MUNDI. II

mus ad impatientiam deiicitur, dum nuper beatus subitam calamitatem ferre nescit. Prætereo tempestates, taceo nocturnos errores, syderum fallaciam, beluarum (quas pontus alit) mille genera non commemoro, quæ ipse pro tuo ingenio & plenius excogitabis & rectius interpretaberis. Quid quod ne tum quidem fidentum est, cum tibi placidum blanditur equor, cum se vitreæ stravere procellæ, cum aëris arridet serenior facies? Id enim agitur ut te subita tempestas sopitum inveniat. Proinde haud scio, sit ne seculi prosperitate virtuti adversus quicquam, quicquam nocentius, quicquam inimicitius. Nam scriptura teste multos quidem frangit calamitas, longe vero plures prosperitas solvit. Tu igitur mundo blandienti cave quicquā, fidas, ne te (quod Deus avertat) fracta navi natantem poëtico illo defleamus versiculo.

*Onimum cælo & pelago confise sereno
Nudus & ignota Palinure iacebis a-
rena.*

CAP. II.

Periculosum est morari in mundo.

VIden optime Iodoce quanta te circumstent pericula, cui vel ipsa est periculosa tranquillitas? Quid? tu ne speras hæc te superare discrimina, ut nihii ulla ex parte detrimenti capias, præsertim in ista ætate quæ vel suo pte impetu in flagiria prona fertur, nedum cum tot irritamentis impellitur? At spero inquis. Speres licet, & ego quoque una spero, sed tamen vereor ne frustra speraverimus. Tu velim hanc nostram spem paulo reddas securiorem. Sed facile suspicor quid inter hæc legenda tecum submurmures. Usque adeo ne istic tuta sunt omnia? Ita ne soli servabuntur monachi? Ergo ne perituri omnes cæteri? Minime vero. Non diffiteor & istic esse quorum nomina liber ille vitæ teneat annotata, neque qui in monasterium commigrarunt, ii continuo res suas ita in tuto collocare, ut plane securos vivere liceat

ceat. At tantum inter hoc & istud vitæ genus interest, quantum inter eum qui iam in portu navigat tamen si nondum reticula fixerit, & eum qui medio adhuc pelago fertur, vel potius inter eum qui natat in undis & eum qui terra facit iter. Non perit qui commoratur in mundo, sed periculo propior est. Ego vero mi Iodoce, quoniam tibi optime consultum velim, sumque tuæ salutis fortasse te ipso studiosior, discrimina fugere, tuta captare iubeo. Qui amat periculum (ut ait sapiens) peribit in illo. Quæso te quorsum opus est sævis iactari fluctibus, cum terra pareat iter & tutius & commodius? Quis (nisi prorsus oculis captus) qui non videat longe esse tutius, iucundius, commodiusque per amœna atque virentia prata absque formidine iter agere, quam inter rot mortis imagines, perpetua cum anxietate versari? Eo ne cæcitatatis ventum est, ut nostris etiam ærumnis delectemur, & (ut apud Vergilium est) insano iuvet indulgere labori? Huc ades ô Iodoce,

quis

14 ERASMI ROTER. DE

quis est nam ludus in undis?

*Hic ver purpureum, varios hic flumi-
na circum*

*Fundit humus flores, Hic candida po-
pulus antro*

*Imminet, & lenta texunt umbracula
vites.*

*Hut ades, insani feriant sine littora
fluctus.*

*Hic liquidi fontes, hic mollia prata
virensque*

*Hic nemus hic ipso tecum consumerer
& vo..*

Libuit hoc Vergiliano carmine te ad nostras delicias ab istis avocare fluctibus. Sed nescio quibus præstigiis, animi tibi fascinat oculos, male blanda mundi species, gestientemque animum itidem ut visco quodam impeditum moratur ac detinet. Subit enim continuo fucata illa rerum facies, iamque euntem blande revocat, quid inquiens agis demens? Cur & te & tuos is perditum? Itane universos deseris crudelis? Ut sodales charissimos atque amicorum turbam contemnas, parentum non miseret? Et

CONTEMPTU MUNDI. 15

Et quid tandem animæ miseræ illi futurum censes quæ te amat misere, quæ te deperit, quæ te maritum optat? Vide etiam atque etiam quid incepres. Mollior es quam qui rem tam duram perficias. Ista ætas, ista forma multo aliis rebus conveniunt. Vah tam indigne ævi florem patieris excidere? Solus perpetua merens carere iuventa? Senibus, quibus iam vita defuit esse suavis, ista relinquant, tu puer es, nec te quicquam nisi ludere oportet. Vel illud respice, Domi res tibi ampla est, futura amplior si manseris. Ea perit. Honoribus satis ornatus es, clariores impendent nite subtraheris. Hæc omnes quærunt, tu unus quæsitâ relinquis? Ergone abis nunquam posthac his fruiturus gaudiis, his opibus, his & his commodis? Saltem da spatium tenuemque moram, mala cuncta ministrat impetus. Audisti, audisti? Et istæ syrenum voces sunt, sed tu per salutem tuam cave auscultaveris. Ulysses te præsta. Mentem tibi excantabunt, si aures accommodes. Blandissime quidem

16 ERASMI ROTER. DE
quidem sunt, atque ita ut vel faxeae
pectora promoveant, sed mortiferas
esse atque in æternum exitium du-
cere memineris. Huc potius aures,
huc oculos, huc animum flecte, col-
lige quicquid in te est viriū, intende
(quam potes acerrime) mētis aciem,
nihil tibi ineptus blandiaris, rem ip-
sam introspice, videbis profecto (si
quid tamen videbis) quam putida,
quam inania, quam denique te sint
indigna quæ evolare non sinunt.

C A P. III.

De contemnendis opibus.

Quid enim tibi pollicetur mun-
dus quod tanti sit ut eius gratia
salutem tuam in dubium venire sinas,
atque à nostris velis abesse delitiis.
Quid, inquā, tibi pollicetur? Opum
affluentiam? Nam eas in primis mi-
rantur mortales. At his nihil mise-
rius, nihil vanius, nihil perniciosius.
Hæ omnis flagitii & magistræ & mi-
nistæ. Neque enim temere omnium
malorum radicem scriptura appellat
cupidi-

cupiditatem. Hinc amor sceleratus
 habendi nascitur, hic iniuriæ oriun-
 tur, hinc factiones pullulant, hinc
 furta, hinc peculatus, hinc sacrile-
 gia, hinc rapinæ, hinc latrocinia pro-
 ficiscuntur. Hæ incestus pariunt, hæ
 adulteria gignunt, hæ supra nutriūt,
 hæ amores insanissimos luxumque
 alunt. Denique quid non mortalia
 pectora cogit auri sacra fames? Vi-
 des igitur quam sapuit Flaccus Ho-
 ratius, qui eas summi materiam ma-
 li vocans, in mare præcipites dari iu-
 bet, si scelerum (inquiens) bene pœ-
 nitet. Tanta enim rebus societas, ut
 etiam vocabulis ipsis cognatio quæ-
 dam esse videatur vitiis ac divitiis.
 Quotumquenque mihi dabis divi-
 tum, qui non alterutro morbo labo-
 ret, aut avaritia (qua nihil est retrius)
 si natura ad rem sit attentior, aut lu-
 xu (quo nihil putidius) si paulo sit
 ingenio benigniore. Alter rei servus
 non dominus est, alter haud diu e-
 rit. Alter habetur non habet. Alter
 mox habere desinet. Alter vivit ma-
 gnas inter opes inops, alter abutitur
 non

18 ERASMI ROTER. DE
non utitur. Pulchre hæc intellexisse
Eutrapelus quidam mihi videtur,
quem eum à quo forte laceffitus es-
set, sic ulcisci solitum accepimus.
Non convitiis, non veneno, non fer-
ro petebat, pretiosis vestibus ditabar
hominem, ratus id quod est, divitias
sui famem excitare, habendi famem
virtutem dedocere, atque ad omnem
turpitudinem ac dedecus impellere.
Sed fac nihil horum evenire, tu sane
sis rara avis in terris, nigroque simil-
lima cygno. Quid tandem pulchri
habent ista pretiosa pondera, quæ &
molestè parantur, & anxie servan-
tur, quorum congestio diros labo-
res, custodia anxios metus, amissio
miseros affert cruciatus? Nullæ ergo
homini locupleti feriæ, aut partis
pervigil incubat, aut parandis in-
hiat, aut amissa dolet, damnum iu-
dicat quoties lucrum non fecerit. Et
quid si montibus aurum æquaverit,
aut si potis est vel vicerit? Auxit sar-
cinam, cumulavit curas, aggressit
metus ac molestiam, paravit sibi cu-
stodiæ munus, miseræ laborisque
plenissi-

CONTEMPTU MUNDI. 19
plenissimum. Crescentem sequitur
cura pecuniam. Crescit amor num-
mi quantum ipsa pecunia crescit.
Et minus hanc optat qui non habet.
Denique misera est magni custodia
census. Vultus ille Horatianus male
de se meritum patronum iudicabat,
cuius ingenio à paupertate sua abdu-
ctus fuerat, seque non divitem sed
miserum factum putabat, orabatque
ut quam primum vitæ priori redde-
retur. Laudandus ille quidem, qui
mature resipuerit. At avarus si mo-
lesta, inquit, est cura, dulcis est num-
mus, non me pigebit laboris dum
crescant loculi. Sed dic mihi homi-
num stultissime dicam an miserrime,
cui nihil satis est, qui opibus tuis aut
arca ferrata reconditis, aut (ut ma-
gis sapias) humo defossis non aliter
quam hesperius ille serpens malis au-
reis noctes diesque incubas, quor-
sum tandem census istos utiles esse,
aut quid reris habere pretii? Nempe
nil aliud sunt quam æs merum, idque
in facies titulosque concisum, quod
nec edaces animi tui curas submo-
veat,

20 ERASMI ROTER. DE
veat, nec morbos illumve corporis
incommodum aut pellat aut arceat,
nedum mortem. At ne egeam (in-
quis) præstant, Nugaris, imo ut sem-
per egeas faciunt. Ut enim homini
hydropico potus sitim non extin-
guir, sed accendit, ita tibi rerum co-
pia, habendi studium crescit. At
quisquis plura quærit, is se egere de-
clarat. Adde nunc infidam rerum
tuarum levitatem. Quæ tutanto tem-
porum spacio, tanta molestia, per
fas nefasque undecunque congefisti,
si fortuna (ut aiunt) rotam verterit,
continuo te deserto alio te commi-
grabunt, tuque modo Cræso beatior
subito Irus eris. Hoc clarius est quam
ut in eo multum sermonem teramus.
Quot enim coram videre est ex re-
giis opibus, ad extremam redactos
inopiam? Sed fac stabilia esse, fac
non deferere vivum, num vita de-
functum sequentur? Tibi in sepul-
chrum ituro, ex tantis rerum copiis,
vix breve idemque sordidum invo-
lucrum tollere licet, cætera iamdu-
dum alios habent dominos. Tum si
qua

CONTEMPTU MUNDI. 21

qua bene gestorum substantia recondita fuerit, ea una in pretio erit, ea una abeuntem non deseret dominum. Tanti igitur suavissime Iodocce tibi non sint vel universa prædia & omne aurum quod Tagus & rutila volvit Pactolus harena, ut salutis tuæ vel iacturam facias vel moram feras. Quin potius si tantopere ditari iuvat, quo vere dives evadas, domini consilium audi. Thesauriza tibi thesauros in cælo, ubi nec erugo, nec tineæ demolitur, & ubi fures non effodiunt, nec furantur. Nihil ea opulentia puta egentius, abundare nummis, egere virtutibus. Nihil eo lucro infelicius, quod animæ damnum adferat. Turpissimum ergo homini, & erudito, & Christiano, id cum summo salutis discrimine improbe sectari, quod ethnicis philosophis vel literarum vel famæ gratia, contemnere haud fuit difficile.

CAP. IV.

Mortiferas atque acerbas esse voluptates carnis.

AN forte te dulces illecebræ capiunt? Blandissimæ quidem dominæ & fucata sua specie orbem fere totum capientes. Sed tu fucum detrahe, cave cutis artificio fucatus nitor te promoveat. Non quid appareant sed quid sint inspice. Videbis istis nihil esse tetrius, nihil spurcius, nihil pecudi vicinius. Nulla enim omnium re ad brutorum conditionem propius accedunt homines, quam fœdissima carnis libidine, quæ eo nocentior quo blandior, ut eam divinus ille Plato escam malorum aptissime vocaverit. Ut enim esca hamo præfixa pisciculos allicit, seque captantes capit, itidem illa melle quodam sua venena dissimulans animas prædæ avidas pellicit, plectas inficit, infectas inclementer perimit. Et ne te diu morer, accipe philosophi sententiam ethnici quidem sed plane Christiana-

CONTEMPTU MUNDI. 23

Christiano dignam, quam apud Ciceronem senior Cato se Tarenti ab Archita Pythagoreo accepisse commemorat. Ait enim, nullam capitaliorem pestem quam voluptatem hominibus à natura datam, cuius voluptatis avidæ libidines temere & effrenate ad potiundum incitarentur. Hinc patriæ proditiones, hinc rerum pub. everfiones, hinc clandestina cum hostibus colloquia nasci dicebat. Nullum denique scelus, nullum magnum facinus esse, ad quod suscipiendum non libido voluptatis impelleret, Etiam illa adnumera, ex ea egestatem, ex ea infamiam, ex ea & graves & turpes corporis morbos, ex ea animi cæcitatem, ex ea numinis contemptum nasci, hanc esse omnis miseriæ caput, hanc esse postremo catenam qua ad æternos cruciatus trahuntur homines. O acerbam dulcedinem quæ tot vallata est miseriis, multæ antecedunt, comitantur item permultæ, plurimæ atque atrocissimæ consequuntur. Dicebam modo ad brutorum conditionem accedere homines,

24 ERASMI ROTER. DE
homines, nunc in ea re pecudes nobis longe anteponendas video. Illæ enim gratis, suis qualibuscunque voluptatibus potiuntur, at homini, Deus bone, quanti constat brevis illa acturpis gulæ ventrisque titillatio. Vides quale sit quod in genere voluptatum vel præstantissimum est (si quid tamen ibi præstans dici debet.) Nunc quid tibi cæteras seculi commemorem ineptias dicam an furias? Mala gaudia dixit quidam, mihi videor non alieno nomine vocaturus si insana gaudia dixerò. Quid obsonationes, ingurgitationes, compositiones, ebrietates, nocturnæ debacchationes, quid choreæ, quid saltatus, quid dissoluti lusus, quid sales scurriles atque impudici, quid id genus alia mille, nonne phrenetici risibus tibi videntur simillima? Quis enim eum hominem non plane mente captum atque insanum censuerit, qui cum aut cruci suffigendus, aut ense cedendus ducitur, nihil instantis supplicii metu trepidet, sed inter se flentium turbam iocabundus saltabundus

bundus atque cum multo cachinno
pergat? At isti Iodoce eo peius insa-
nire mihi videntur, quo crudelior
corporis morte mors animæ est. Du-
cunt in bonis dies suos, & in puncto
ad inferna descendunt. I nunc & ut
brutæ ac morituræ carni vel ad ho-
ram obsequare, à conditore defice:
ut illa perditæ vivat, animam occi-
de, ut illa caducis potiatur gaudiis,
tu perpetuos tibi luctus compara. Sed
tu forsitan legitimam venerem amas,
uxorem cogitas. Non equidem dam-
no nuptias, memini qui dixerit, me-
lius est nubere quam uri. Pateat istud
infirmis asylum. Non invideo Se-
gor urbem magnam & non magnam
ex incendio Sodomorum fugienti-
bus, sed novi robur animi tui. Com-
probo nuptias, sed in his, qui sine
illis non possunt vivere. At quid his
de rebus divus Hieronymus scripse-
rit, scripsit enim permulta, vide. Hoc
unum pro nostra familiaritate tibi
quasi in aurem dicam, monens etiam
atque etiam orans & obsecrans, ut
caveas ferreo isti capistro ora porri-
gere,

26 ERASMI ROTER. DE
gere, quod ubi semel admiseris, haud
facile excutias. Non male sunt nu-
ptiæ fateor, at miseræ certæ sunt. Cē-
libatus ut multo melior, ita infinitis
partibus infelicior.

C A P. V.

Vanos & instabiles esse honores.

Sed delectant te forsan illustres
tituli atque honorum splendor
capit. Quid ni? scilicet pulchrum,
late ut ille ait, conspicuum tollere
verticem, gaudes quod spectant o-
culi te mille loquentem. Iuvat am-
biri obsequiis, stipari clientela, in
ore esse omnibus, herum salutari
denique. Verum dic age, quod tibi
isti videntur honores quos tibi mor-
tali mortales partim assentandi stu-
dio, partim metu, partim commodi
spe exhibent? Nempe tam falsi sunt
quam caduci. An non falsi qui æque
perditissimo cuique ut optimo obve-
niunt? Eos demum veros honores
iudica, qui à virtutis decore profe-
cti sunt, Tu fac virtutem amplectare,
iam

iam te vel invitum prosequuntur. Ut enim umbram post se corpora ducunt, quam nec fugientem deserat, nec à captante prendi se sinat, ita recte gesta ultro dignitatem adferunt, quam nec meritis effugias, nec immeritis assequare. An vero quicquam magis fluxum magisque caducum. Mihi quidem cum omnes mundanæ res fluxæ ac breves videntur, quid enim hic diuturnum dicas, tum iis nihil videtur incertius, fugaciusque quæ plurimum habent splendoris atque fastidii. Et cum nihil comparetur molestius, diu enim adversus præruptum montem volvendum saxum cum Sisipho, audendum est aliquid exilio, carcere, aut etiam cruce dignum ut tandem fias aliquid, cum nihil igitur comparetur molestius, nihil tamen amittitur facilius. Quur ita inquis? Nempe summam dignitatem summa consequatur invidia necesse est. Summa petit livor, perfiant altissima venti. Semper enim insignes arduasque res illa comitari solet. Quid deinde? Qui multorum

28 ERASMI ROTER. DE
sibi conflagavit invidiam, is multos vi-
tæ suæ hostes ferat oportet. Quur ita?
Nam cum multi ambiant quod unus
tenet, nec te salvo assequi spes sit, te
quoquo modo tollant necesse est.
Difficillimum est autem cui tot ten-
duntur casses, non tandem in unum
aliquem incidere. Aut ergo tibi ve-
neno aut ferro percundum, aut (ut
optime cadas) exilio salus redimen-
da est. Aut (ut sis fortunatissimus) in
perpetua anxietate, ac metu ne præ-
cipiteris claram quidem, at acerbam
vitam ages. Iamne igitur scite Iuve-
nalis dixisse videtur:

*Nam qui nimios optabat honores
Et nimias poscebat opes, numerosa pa-
rabat*

*Excelsa turris tabulata, unde altior
esset*

*Casus, & impulsæ præceps immenso
ruina.*

Sed quorsum ista tam verbose? Scili-
cet ut plane mi Iodoce intelligas,
quam plena metus, quam plena an-
xietatis, quam denique caduca sint,
si qua mundus iste præ se fert subli-
mia.

mia. Atque id quidem te incolumi.
 Quid ubi incumbat rerum amarif-
 sima mors? Cum subito omnis illa
 illustriū imago evanuerit insomnio-
 rum more, quæ una cum sopore a-
 volant. Ubi prisca tyranni? Ubi ma-
 gnus ille Alexander, cuius olim am-
 bitioni angustus erat orbis? Ubi
 Xerxes ille, cuius classibus constrata
 redundarunt æquora? Ubi toties vi-
 ctor Hannibal, qui dum vixit sco-
 pulos & montes rupit aceto? Ubi
 Paulus Aemilius, ubi Iulius, ubi
 Pompeius, ubi cæteri, aut ex Græ-
 cis, aut ex Romanis, aut ex Barbaris
 clarissimi principes, quos singulos
 recensere & molestum esset, & pro-
 pe ociosum? Quid de tanto rerum
 splendore atque maiestate superest,
 præter inanem quandam hominum
 fabulam, quam & ipsum literatorum
 officio debent, qui nisi illorum vo-
 cabula suis scriptis posteritati com-
 mendassent, tanta essent oblivione
 sepulti, ut ne tenuis quidem ipso-
 rum memoria usquam resideret. Sed
 hoc quicquid est, ad nos fortassis

30 ERASMI ROTER. DE
aliquantum, ad illos nihil attinet, ne-
que enim illi nunc eadem quæ olim
mirantur. Profecto si nunc ab infe-
ris emergeret ille regum, quorum
meminimus maximus Alexander, a-
spiceretque orbem tanta ambitione
flagrantem, credo irrideret inania
studia vulgi, atque hac, aut huius-
modi oratione, verum iam experi-
mento doctior fateretur. Quo rapi-
tur cæcus error mortalium? Res soli-
das veras profuturas nemo miratur,
noxias, inanes, incertas, omnes tan-
to labore petunt. Quid tam impro-
be, tam pertinaciter in sublime tolli
conantur? Vel meo discant exemplo
omnes mortalium dignitates cada-
cas esse nebulisq; simillimas, quæ
eadem sæpe hora & latissimæ solent
esse & nullæ. Ego ego ille imperato-
rum olim facile opulentissimus, qui
invictus rerum omnium verticem
tenui, qui reges innumeros Barba-
rosque populos perdomui, qui orbe
fere subacto, æquora quoque rima-
rus, æthera demum tentavi. Felix
plane siquidem mortē etiam terrere
potuif-

potuisssem, at ea cuncta vincentem
 vicit, & quidem levi febricula. Ne-
 que tam subito aut spuma inflata di-
 labitur, aut fumus perit in auras, quā
 omnis ille rerum strepitus evanuit.
 Heu quantum quam repente muta-
 tus sum ab illo Alexandro cuius olim
 edicta totus perhorruit orbis, nunc
 is ut vel ab infimo quoque contemni
 ledique impune possim. Quondam
 cupiditate minor erat immensa mun-
 di vastitas, nunc urnula perangusta
 atque adeo septem pedum coërceor.
 Mors enim sola fatetur quantula sint
 hominum corpuscula. Olim adorato
 amiculo radiante diademate, purpu-
 raque ardente conspicuus, nunc vel
 visu foedissimus nuda ossa cinisque a-
 ridus iaceo. Et quo mihi insignia
 stemmata, quo auro picta monu-
 menta? Quorsum operosa pyrami-
 dum fabrica neque videnti, neque
 sentienti? Atque utinam cum corpo-
 re suo & animus una intereat, neque
 mortem istam multo acerbior mors
 sequeretur. Sed heu ille maximo suo
 superstes malo totius actæ vitæ pœ-
 nas

32 ERASMI ROTER. DE
nas dare cogitur. O ter felices qui id
vivi persuasere sibi, quod nos exper-
ti, sed sero intelligere cœpimus. Sa-
piunt, sapiunt, qui sua sorte conten-
ti, ipsi se vincere certant, sibi magis
imperare quam aliis, potiusque illud
cœleste atque perpetuum, quam hoc
terrenum caducumque ambire impe-
rium. Magnus rex est quisquis se be-
ne rexit. Quid potest esse hac o-
ratione verius: & quem tam vera tam
miserabilis oratio ab ambitione non
deterreat?

C A P. VI.

*De mortis necessitate qua nihil finit
esse diuturnum.*

SEd æquo longior sum præsertim
in re lucē prope ipsa clariore. Is
enim nunc rerum cursus, ut si qua
miranda veteres annales narrasse visæ
sunt, nunc nemo sit qui credat, quum
tristiora exempla iam videat quam
legerit. De morte autem (quando de
ea sermo incidit) id in primis admi-
rari soleo, quo pacto, quum nihil
ita

ita ut ea sit in oculis, nihil ita absit ab animo. Quid quod & vocabulum à morte duxere mortales, quo sit ut nominari non temere possimus, quin aures nos ipsæ mortis commoneant? Et ne sic quidem timemus. Quid hoc lethargiæ, quæ hæc est humanarum mentium securitas dicam an dementia? Itane male memores sumus, tantumque ex amne lethæo (ut aiunt) oblivionis hausimus, ut ea quæ nunquam se sensibus nostris ingerere desinunt, non meminerimus? Itane saxorum in morem perstupuimus, ut toties auditis, toties visis non excitemur? Videmus ne unum quidem ex priscis ætatibus superstitem? nostro quoque ævo nulli omnino hominum generi mortem parcere cernimus. Abiere maiores, illudque Ciceronis eis convenit. Vixerunt, nos sine omni discrimine eodem vadimus, sequuntur item posterī. Ita rapidissimi in morem amnis omnes in occasum præcipites volvimur. Omnes eodem cogimur (ut ait Horatius) omnes una manet nox. Et cal-

34 ERASMI ROTER. DE
canda semel via lethi. Mixta senum
& iuvenum densantur funera, nul-
lum sæva caput Proserpina fugit. Ca-
dunt hinc atque hinc innumeri ex
maioribus natu, ex natu minoribus,
ex æqualibus, ex familiaribus, ex ne-
cessariis, ex cognatis, ex parentibus,
ex liberis, inter medias morientium
strages ipsi morituri versamur, &
quum eadem simus conditione, ei-
dem fato nati, non idem metuimus.
Quid tu inquis me iam nunc mor-
tem cogitare iubes: ætas integra est,
longe abest ut canis albescat caput, ut
frontem seniles rugæ contrahant.
Ii mortis metu vivant anxii, qui an-
nis iam graves, senio incurvi terram
salutant, quibus iam leve caput, ma-
læ pendulæ, oculi minores atque in-
trorsum refugi, nasus perpetuo ma-
dens, dentes rari, iidemque luridi,
qui cornici vivaciores, iam dextra
suos annos computant. Ab his ego
longe absum. Ferver adhuc vividus
circum præcordia sanguis, lacerti va-
lidi, latera firma, denique omne cor-
pus vegetum adhuc & succi plenum
in spem

in spem diuturnæ vitæ vocat. Verum age quis deorum tibi canos, quis seniles rugas pollicitus est? Si nisi canum neminem efferri vides, vive securus, nec ante canos ac rugas de morte cogites. Si illa in omnem ætatem grassatur, si nondum editos præfocat, arcens potius à vita quam tollens, si infantes à maternis abrumptuberibus, si rapit impuberes, si puberes tollit, si viros extinguit, si senes excipit, si denique nullum neque sexus, neque ætatis, neque roboris, neque formæ novit discrimen, num te unum habitura est eximium? At senex quidem diu vivere non potest. At tu adolescens cito mori potes. Quam illi mors certa, tam tibi vita incerta. Nemo tam senex quin unum adhuc diem supervivere possit, nemo tam iuvenis qui hodiernæ lucis sibi vesperum possit polliceri. Et quidem si diligentius observes, longe plures ephebos, quam canos efferri comperies. Quum semper rara fuit canicies, tum hac tempestate nunquam neque contemptior, neque

36 ERASMI ROTER. DE
rarior. Quot mihi iam monstrabis
non dicam Tithonos, Nestores, Si-
byllas, aut Mathusalem, sed cen-
tenarios? Imo quocumque nunc eo
ætatis venire contingit, ut sexagesi-
mum videat annum? Profecto vix
millesimo cuique mortalium. Et
quantulum est hoc ævi? Et tamen
quam rarus sit qui attingat vides, a-
deo fragilis, incerta, totque casibus
subiecta est vita hominum. Vistibi
huius rei Iodoce exhiberi simula-
chrum & dilucidum, & accommo-
dum? Prima æstate florentem arbo-
rem contemplare, tanta florum den-
sitate luxuriat, ut nusquam truncum,
vix usquam folia videas, tantam ger-
minis ubertatem promittit, quantæ
ne ferendæ quidem par fuerit. At ex
tanto florum numero vix pauci ad-
modum adolescunt, partim erucis,
partim araneis corrumpuntur, par-
tim vento, partim pluvia excutiun-
tur. Iam positis foliis ii ipsi qui super-
stites sunt (ut ita dicam) fœtus (nam
flores esse desierunt) videntur sen-
sim in pomi carnem turgescere. Num
per-

perstant ad maturitatem omnes? Minime. Multos tinea exedit, alios ventorum tempestas decutit, alios immodicus imber corrumpit, plerique alia quavis peste læsi demoriuntur, ut tandem ex tam divite spe, vix paucissima poma cerpas. Nec paucioribus incommodis vita petitur humana. Mille morborum nomina, mille item mortis casus, mille modi lethi, mille mortis laquei, quibus multo plures præmatura intercipit, quam matura solvit. Et quum tot tantisque periculis exposita sit vita mortalium, vide obsecro quæ sit socordia, perinde vivere, tanquam nunquam simus morituri. Aliena curamus, ea quibus adversus mortem instructiores esse possemus, apparare cessamus. Quid si regi cuiquam cū hoste capitali res esset, ac nesciret quidem quam prope abesset, at hoc certe exploratum haberet non longe in insidiis esse, ac iamiam commoditate accepta erupturum, num is rebus hoc loco stantibus, de balneis ædificandis, aut ornanda cœnatione, aut uxore ducenda

38 ERASMI ROTER. DE
cenda cogitabit, ac non potius de co-
piis augendis, de vallo iaciendo, de
excubiis, de armis ac cæteris rebus
militaribus, quibus hostem frange-
re possit? Id vero curabit eo diligen-
tius, quod incertus sit quo tempore,
qua parte erupturæ sint insidiæ. Ast
mors nobis (qua nihil capitalius) o-
mnibus locis, omnibus ætatibus,
mille modis insidias struit, & nos
interim (si Deo placet) miramur ar-
gentum, curamus cutem, ambimus
magistratus. Quod si fallacis ævi in-
certam fidem, atque impendentem
omnibus horis mortem omnibus
horis cogitaremus, nostrisque ipsi
auribus ingereremus id quod vates
ille ægroto regi. Dispone domui tuæ,
morieris enim, continuo omnia ista
male sapida amarescerent, pretiosa
vilescerent, inclyta sordescerent. Ita
una mortis memoria omnium facile
rerum contemptum persuaserit. Quo
enim tibi ò avare tantum auri recon-
ditur? Mors imminet universa ra-
ptura. Quid tu brevissimo itineri
tantas paras sarcinas? Num excidit
quid

quid euangelico illi stulto evenerit? cui sibi de confertis horreis gratulanti, multaue gaudia pollicenti dictum est. Stulte hac nocte animam tuam à te tollent, & ista quæ parasti cuius erunt? Tu vero hominum vanissime, quid tanta improbitate insana sectaris gaudia? Respice, mors tibi cominus incumbit, istas quantulasunque illecebras in æternos mutatura cruciatus. Tibi porro ô ambitiose, quæ incessit tam dira regnandicupido? Ecce tibi mors in foribus, quæ te ex isto rerum fastigio in humum præcipitet, atque turbinis rapidissimi more te tuaque omnia tollat. Nec minus igitur vere quam erudite Rodolphus Agricola noster scripsit. Omnia mors sternit, quod natum est occidit, una sine caret virtus, & bene facta manent. Quid enim in eo urgentissimo fati supremi articulo, præter unam virtutem reliquum erit? Quum exangues artus una & sanguinis calor & vita fuget, ora horrendus quidam livor tinget, oculos dudum tam vividos perpetua caligo

40 ERASMI ROTER. DE
caligo obscurabit, & omne denique
corpus frigidus quidam stupor occu-
pabit, anima vero miseranda (utpote
cui desertæ omne negotii pondus in-
cumbit) ad severum illud atque inex-
orabile prætorium abripietur, quo
pacto quæquæ gesserit rationem po-
stulanda. Quid tum inquam ex o-
mnibus supererit, quibus parandis
ætatem trivisti omnem, unde opem
petas? Quo tum miser eo fugies, quo
confugies miser? Ad opes? At hæ &
nihil opitulari possunt & iam dudum
alios nactæ sunt dominos. An vero
ad voluptates? Sed istæ, ut corpore
concretæ, una cum corpore moriun-
tur. Ad ætatis iuvenile robur? At
sua cuique senectæ mors est. Num
vero ad formæ egregium decus,
qua dudum superbus omnium ti-
bi conciliabas amores? At ista ro-
sæ in modum, quæ pollice decisa
continuo demoritur, ita morte de-
cerpta omnis emarcuit. Minus ve-
ro dixi emarcuit, imo omnis in
horrorem abiit. Nemo enim tam
viventis formam amavit quam hor-

ret extincti cadaver. Anne ad pristinam gloriam? Atqui hæc (ut docui) cum vita prorsus evanescit. Quotandem igitur? Ad amicorum turbam? Verum isti partim, ut hirundines exacta æstate, ita cum fortuna una devolarunt, cæteris (si qui perstiterent) opis ferendæ facultas est nulla. Et quid tibi conducet si illi pectora sua miseri plangent, si vultus lanient, si quicquid in ipsis sanguinis est, in lachrymas versum funeri tuo impendant, si denique tua causa insaniant, mortisque addant sese comites? Sibi mala accersere, te eripere non possunt. Sapiens igitur si fortis tuæ non sero memor, ea pares, quibus munitus, supremum diem securus expectes. Opes, voluptas, claritas, & si alioqui solida ac utilia erant (quod multo secus est) certe morituro sunt oneri. At tum demum virtus incipit esse usui. Illa si non nobis, certe nos illis subtrahimur, virtus nunquam comitari, nunquam rueri desinit.

Mundum miserum esse & sceleratum.

HAbes mi Iodocem charissime
 quam falsa, quam fugacia, quam
 pestifera sint seculi bona (si qua ta-
 men sua in re bona appellari debent)
 nunc contra illius mala paucis acci-
 pe. Olim forsan nihil monstri fuit æ-
 gre à mundo divelli, quum quadam
 sua (ut ita dixerim) iuventutē floreret,
 nunc nisi ipsi nos studio fallimus,
 quid est quo mundus possit fallere?
 Quotquot olim singulæ singulis se-
 culis clades incubuere, nunc uni in-
 cumbunt universæ, bella, factiones,
 caritates, penuriæ, sterilitates, mor-
 bi, pestes, & quid non videmus no-
 stro ævo mali? Iam quartum & vige-
 simum annum agimus, nullas hoc to-
 to spacio à bellorum strepitu ferias
 vidimus. Syllana nobis tempora fa-
 ctionis partibus referentibus, qua-
 rum utraque victrix evadat, victa
 certe patria, immeritas pœnas pen-
 dere cogitur. Penuriæ vero quam
 miseran-

CONTEMPTU MUNDI. 43

miseranda exempla vidimus, ut plerique homines pecudum pabulo victitent, plerique inedia pereant. Ut nunc secula sunt Cræsus sit necesse est, qui familiæ suæ vel parcum victum suppeditare possit. Adde illud (& si tu alioqui felix vivas) ita calamitatis plena sunt omnia, ut te auditi quæstus, visæ miserorum miseræ miserum reddant. Scelerum præterea ita increvit seges, ut iam ferream illam ætatem longe vicerimus, de qua ante mille annos cantatum est. De duro est ultima ferro.

*Protinus erupit vena peioris in ævum
Omne nefas, fugere pudor verumque
fidesque,*

*In quorum subiere locum fraudesque
doli que,*

*Insidiaque, & vis, & amor sceleratus
habendi.*

*Vivitur ex rapto, non hospes ab hospi-
te tutus.*

*Non socer à genero, fratrum quoque
gratia rara est. At nunc.*

*Nona atas agitur, peioraque secula
ferri*

Tem-

44 ERASMI ROTER. DE
Temporibus, quorum sceleri non inve-
nit ipsa

Nomen, & à nullo posuit natura me-
tallo.

Nunc si depositum non inficietur ami-
cus:

Si reddat veterem cum tota erugine
follem:

Prodigiosa fides, & ruscis digna li-
bellis:

Quaque coronata lustrari debeat agna.
Rari quippe boni, numero vix sunt to-
tidem, quot

Thebarum porta, vel divitis ostia
Nili.

Quid tibi & seculo, si peierare, si cir-
cumscribere, si fallere, si rapere aut
non vis aut parum calles? At quid
mea inquis refert, cuiusmodi secu-
lum sit, mihi veri rectique cura est.
Si qua recti cura est, fac te istinc quam
primum abripias. Nullum enim se-
culo cum virtute commercium.
Mentior, si non id veritatis ille præ-
cipuus amicus clamat. Totus mun-
dus in maligno positus est. Nec ista
tibi oratione blandiaris. Quid alii
gerant

gerant nihil ad me attinet, mei unius mihi cura est. Erras tota (ut ait Comicus) via. Permagni vero Iodoce interest, quibus cum victites. Non aliter enim quam corporis vitia contagio serpunt, serpunt & animorum morbi. Improbo convictu nihil perniciosius. Esto sane tu quidem virtutis amantissimus, adscisce vero tibi convictorem perditum, quando futurum est ut tu illum ad tuos mores redigas? Ille magis (ut sumus natura in vitia proclives) tibi sua venena efflabit, suam tibi adfricabit scabiem, ac sui denique similem reddet, apte-que tandem conveniet id vobis proverbii, quod vulgo nemo non dictitat. Concoloribus plumis aves una volitant. At quis me adiget inquis ut cum homine scelerato & perduto victitem? Rogas? Ista ætas, negotiorum tuorum necessitas quædam, præterea pudor illiberalis quidem ille, sed certe generosis fere animis insitus, postremo sodalium improbitas. Ad computationem vocatus (ne quid obscœnius dicam) si aut negocia

cia excuses aut valetudinem, ne iuranti quidem creditur, parculus, aut sordidus videris. Quid facias? Tu sane quo notam tam insignem caveas obtemperas. Ubi in popinam, aut ænopolium ventum est, alterni accumbatis iuvenes ac puellæ. Quod honestissimum sit dico, turpiora pudet dicere, quum illos sæpe non pudeat facere. Tum bibendi certamen oritur, in quo ut bibacissimus quisque fuerit, ita maxime festivus, bellus, ac nitidus habebitur. Hic quid non ebrietas designet? Fœcundi calices quod tandem non audeant nefas? Tum Pithyas multo videtur formosior. Tum Chremes longe factus hilarior, vere vulgo dici fatetur sine Cerere & Libero friger Venus. Postea ubi eos epularum satietas cæpit, ad choreas surgitur. Cuius animus sic compositus, sic firmus, sic marmoreus, quem lascivi illi motus, agitataque in numerum brachia, citharæ cantus, voces puellares non corrumpant, non labefactent, non molliant? Adde quod ea sæpe carmina

mina sunt, quibus incendi iam frigidus ævo laomedontiades & nestoris hernia possent. At ubi choraules (cithara ex more tacta) quiescendi signum dedit, rusticus habebereis, niam cuius levam complexus saltasti, disuaviatus fueris. Cæteri lusus his impudentiores, atque ad meram lasciviam excogitati, à me non dicentur, utinam ab illis non agerentur. Quorum si tu quicquam recusaveris quid gravius; si quid prudentius agere tentes inurbanum, illepidum, tristem, agrestem, atque à communi hominum sensu abhorrentem ducunt. Id ignominia ut caveas, quam non turpitudinem admittis? Sic sic dum fugis odio esse, dum pudet difficilem videri, dum pudet non esse impudentem (ut divus ait Augustinus) omnem pudorem dediscis, ac simili scabie infectus, & ipse alios pergis inficere. Sed fac tibi cum nemine esse improbo consuetudinem (quanquam miror istud ut fiat) solet morbi virus non contactu modo (unde nomen duxere contagia) verum etiam aspectu

48 ERASMI ROTER. DE
ctu serpere. Quum spectant oculi læ-
sos, læduntur & ipsi. Ego quidem ir-
ritamentorum quibus ad turpissima
quæque impellimur, oculos multo
maximam partem puto. Tu igitur
Iodoce optime si vitæ tuæ consultum
velis, fac ab ista scabie te quam ma-
xime seiunxeris, atque ad eos con-
feras quorum te reddat consuetudo
emendatiorem.

CAP. VIII.

De felicitate vitæ solitaria.

Quāquam itaque hæc comme-
morasse abunde satis esse puto,
attamen ne alacer modo istinc exi-
lias, verum lætus ac lubens huc ad-
voles, id est non tam seculi mala per-
osus, quam nostrarum deliciarum
cupidus, nunc vitæ nostræ commo-
da paucis commemorasse haud ab re
fuerit, id quod brevius fieri necesse
erit, tum quod tantum temporis &
chartæ & operæ commemorandis vel
strictim seculi malis dedimus, ut his
narrandis minus supersit, quam rei
immen-

immensitas poscit (quanquam quis huic rei sermo, aut quod sermoni tempus, par fuerit.) tum quod te iamdudum nostræ loquacitatis subirasçi suspicor, tum etiam quod eæ res sunt quæ facilius sentiantur quam narrêtur. Malim igitur te eas experimento, quam nostro sermone discere, explorare, quam persuaderi. Tu modo fac te ex isto turbido rerum strepitu, ad nos ocyus recipias. Tum demum intelliges, quantum absit à vera felicitate, & falsa, & fallax mundi prosperitas, quanto nostri labores vestris præstent delitiis. Intelliges inquam expectecti more, qui dum somniaret, ea simulachra, quæ dormientē illudebāt, esse vera existimabat, gaudebat, trepidabat, æstuebat, & mille motabatur affectibus, sed simul atque somno solvitur, se vanis imaginibus illusum comperit, rideretque ipse sua insomnia. Ita tu ubi instituti nostri felicitas comperta erit, tum quoties illa pristinæ vitæ somnia animo iam vigilantī subierint, vah inquires, adeone delirasse

me unquam, ut hæc atque illæ nugæ
 me delectaverint? Itane rapuisse
 animum inanum bonorum phantas-
 mata, ut verorum ne cupido quidem
 ulla subierit? Nunc igitur Iodoce ni
 somnio quam re beatus esse mavis
 si dormis expergiscere, si dormitas,
 ne somnus altior temporibus obre-
 pat, oculos excute, si vero (quod
 magis reor) vigilas, ne quando dor-
 mientium exempla & religionis so-
 mnifera quædam vis somnum inire
 suadeat, ex illa Babylone terra in-
 somniorum umbrarumque plena e-
 volare, quod potes propera, atque ad
 nostram Hierusalem advola: quid
 respectas? Quid restitas? Quid hæ-
 sitas? Semper, ut apud Lucanum est,
 nocuit differre paratis. Rumpe age
 moras omnes neque enim aut leve
 aut ludicrum negotium vertitur. Ani-
 mæ res agitur, digna plane ob quam
 vel amantissima deseras & durissima
 ultro subeas. Nā si peritus quisquam
 medendi artifex, capitali morbo la-
 boranti diceret, sine paulisper iam
 saxo pristina valitudine gaudeas,
 cedo,

CONTEMPTU MUNDI. SI
cedo, quos non lubenti animo ferres
cruciatu? sineres corporis membra
ferro rigido secari, sineres excidi, i-
gnibus aduri, aliisque mille tormen-
tis affici, ipsa propemodum morte
crudelioribus modo mortem effuge-
ris, imo ut huic vitæ miseræ paulu-
lum quiddam temporis accederet. Et
quid per Deum immortalē, ulla ne
res molesta videbitur, quam mortis
tum animæ tum perpetuæ defugien-
dæ gratia subeas? Si ita tibi res essent,
ut alterutra esset accipienda condi-
tio, aut sine istud extinguī cor-
pus, ut sempiterno ævo vivat anima,
aut corporis vitam animæ morte pa-
ciscare, credo nihil hæsitares (nisi
quovis phrenetico peius desiperes)
quin animi perpetuam vitam, cor-
poris brevissima duceres potio-
rem. Visne igitur Iodoce suavissime & be-
ate & perpetuo vivere? Mirum ni ve-
lis. Quis enim nolit? At quo, inquis,
pacto istuc assequi licet? Vide age
quantam rem quantulo labore fas sit.
Non tibi Dedaleis pennis tentandus
æther, non vasta traicienda æquora,

non Herculei subeundi labores, non ignibus infiliendum, nemo te adigit, ut membra tua lanies aut mortem tibi conciskas, deniq; quanquam quis priscos martyres insanisse dicat, qui huius felicitatis spe adducti, nullos cruciatus, ne mortem quidem ipsam durā iudicavere? vide obsecro quam sit profusa in nos domini nostri munificentia, & contra quam mollia iussa. Perpetuam felicitatem, mortem commeritis pollicetur. Quid hac pollicitatione liberalius, quid certius? At nunc quid te iubet facere? Nihil, nisi ut tu te interim tanti muneris capacem præstare studeas. Quo istud pacto fiat rogas? Is nondum veræ felicitatis capax est, quem falsa captum detinet, vis æternum vivere? Fac bene vivas; vis adire paradysum? Relinque seculū ut sceleratissimum, ita & afflictissimum. Deo iungi cupis? cura ut diaboli nexibus expliceris. Veras amas opes? Falsas abiice. Veri iuvant honores? Falsos ambire desine. Quid plura? Veram beatitudinem amas? Istas dulces ærumnas, imo

imo ærumnosa dulcedines fac reliqueris. Quid his præceptis mollius, quorum observationi cum vera felicitas merces debeat: ipsum tamen observare, est cœpisse felicem esse. Tanquam iubeat desinite miseri esse, ut beati sitis; desinite servire, ut libertate gaudeatis. Et ô nimium dissimile diaboli ac Dei servitutem, ô diversam militiam. Ille enim ubi miseros falsa quadam delectatiuncula inescarit, papæ in quos horrores, in quas turpitudines, in quas miseras coniicit, ac postremo ubi satis ludibrio habuit, iugulat: hic per breves atque exiguas molestias (quas ipsas nostra, non rerum culpa patimur) ad incredibilem iucunditatem inducit, ac postremo cœlo beat. Illius inauكتورatio subdola, militia acerba, stipendium (quod scriptura teste mors est) acerbissimum. Huius obligatio fidelis, militia quanto diuturnior, tanto suavior, stipendium suavissimum, quod est beata immortalitas. Illis vita misera, mors miserior, post eam vita miserrima. His vita felix, mors

54 ERASMI ROTER. DE
felicior, quam vita consequitur felici-
cissima. Et quis sub hoc tam levi, tam
liberali imperatore non quam luben-
tissime, vel gratis meruerit, qui tam
dulces imperat labores? Quod si mihi
parum habes fidei, ipsum qui fallere
nescit (quid enim mentiatur veritas)
hortantem audi. Tollite iugum meum
super vos, & invenietis requiem a-
nimabz vestris. Iugum enim meum
suave est, & onus meum leve. Quid
tandem gaudiorum futurum rere iam
parta victoria, in cœlis sempiternum
triumphum celeberrima cum pompa
agentibus, quum sic delectet militiæ
labor? Qua nos voluptate afficiet fe-
lix illa libertas, quibus suave est vel
iugum? Sed fore suspicor quibus mi-
raculo futurum sit quod diximus, eos
nimirum de illorum grege hominum
qui pecudum simillimi omnem feli-
citatem, aut palati, aut ventris vo-
luptate metiuntur. Ii ægre adduci po-
terunt ut credant labores in quibus
monachorum vita versatur, non mo-
do molestos ac tristes esse, sed hila-
res etiam ac iucundos. Verum iis
quando

quando ne veritas quidem ipsa veri facit fidem, iubeo ipsos explorare, periculum facere. Moriar si quid fefellerō, modo ne ab ipsorum parte peccatum fuerit, qui non ut oportuit tentaverint. Quod si experiri piger, certe expertis fidem habeant. Ego quidem iurare ausim, nihil hic non esse voluptatis plenum. Pauperie nostra nihil locupletius, servitute nihil liberius, labore nihil quietius, inedia satura, angustiae spaciosissimae, moeror iucundissimus, amaritudo perquam suavis, vigiliae somno quovis gratiores. Verum haec ne iuranti quidem crediderint, imo me tam contraria iungentem nihilo iudicabunt saniores eo qui noctem lucidam, diem obscurum, aut ignem frigidum, aquam calidam contendat asserere. Verum quid facias pecudibus istis, qui rationis expertes, solis corporeis sensibus sapiunt? Age mos gerendus est illorum tarditati. Aliquo sensibus familiari argumento adducendi sunt, ut ex notissimis parum nota coniiciant. Rus eos ducamus,

mus, aut certe si id molestum est, portus propior est ubi nautarum unumquemlibet accitum sic percontemur. Heu tu bone vir, num tibi molestus est labor ille nauticus? Imo (inquiet) dulcis. Qui sic? Nam quæstus iste vel omnium plurima ac maxima videtur habere incommoda. Verum. At contra plurimæ res sunt quæ me fatigari non sinant. Quæ? primum dulce lucrum quid non dulce faciat? Nihil mari locupletius. Multi hodie vivunt, quos ex pauperrimis ditissimos una navigatio fecit. Quid si idem mihi eveniat? Deinde assuetudo ipsa bona me molestiæ parte levat, quæ profecto tantum in rebus habet momenti, ut nihil factu sit tam acerbum, quin sæpe factitatum aut dulce aut certe leve fiat. Postremo sunt quibus ita laborem mitigamus, aut potius fallimus, ut ne animadvertamus quidem. Cantus, sermones, lusus, facetiæ, atque eius generis alia mille. Audistis ut arbitror satis dilucide. Nunc si singulas officinas lustremus, credo singulos aut eadem,

aut

CONTEMPTU MUNDI. 57
aut eiusmodi responsuros. Quid igitur? Si operariis istis lucelli vilissimi incerta spe summus dulcescit labor, quid ne idem in nobis efficiat sempiternæ felicitatis expectatio certissima. Si apud illos tantum valet assuefactio, quid causæ est, cur non idem apud nos possit? Si illis sunt quibus incommoditates suas leniant, nobis certo sunt multo & plura & potiora.

C A P. IX.

*Libertatem summam, non in mundo,
sed in secessu.*

Quæ quidem (ne perturbate diutius ac sine ordine feratur oratio) in tribus potissimum mihi constare videntur, libertate, tranquillitate, ac voluptate. Ac libertatis (ut de hac primo loco differamus) natura cupientissimi sumus omnes, servitutem nemo non horret adeo ut plerique eius odio mortem sibi consciverint, libertatem vita iudicantes potiore, mortem servitute. Quare si adeo libertate delectantur homines,

ut emendam tanti falsam putent, nostrum vitæ institutum amplecti atque expetere debent, utpote quod & summam & veram habeat libertatem. At hic mihi imperitior aliquis dixerit. Si libertas (Cicer. definitore) est potestas vivendi ut velis, quam nobis sit libertas omnino non intelligo, quibus volucrum more cavea inclusis, nisi abbatis iussu tentare licet nihil, non edere, non loqui, non dormire, non vigilare, non ire, non redire, non vel hiscere. Hoc cene tandem est liberos vivere? Non hercle magis, quam liberi sunt equi & asini, qui frenis ac stimulis, quocunque libitum est fessori circumaguntur. Sed istud facile solvitur. Nam nihil nobis quod non liceat libet, licet igitur quicquid libet. Verum de nostra libertate posterius. Interim sine te vicissim perconter, qua tandem fronte tu tibi libertatem vendicas, cui tot sunt domini, quot vix uno die pernumeres. Principio tibi secularibus (ut vocant) necessitatibus serviendum est, quibus quisquis semel
manus

manus dederit, ita illum irretire ne-
 xibus, tantis complecti catenis so-
 lent, ut quocunque vocarint sequen-
 dum sit. Quid si & uxorem habeas,
 imo habearis? Est enim res recipro-
 ca coniugium. En tibi alteræ compe-
 des. Accessit molesta sane servitus,
 atque ex qua haud facile te expedias.
 Quid si etiā sceleratus sis? per Deum
 immortalem, in quam duram servi-
 tutem te afferuisti, iam tibi quot vi-
 tia sunt, tot dominis parendum est &
 quidem teterrimis, improbissimis,
 scvissimis. Quis enim eum liberum
 censuerit, qui libidini suæ nihil tem-
 perare potis est, sed quidvis, etiam
 turpissima (ut semper) ac durissima
 (ut sæpe) imperanti obtemperat.
 Somnios poscunt oculi, libet dormi-
 re. At contra ne facias, vetat impe-
 riosa admodum hera libido, iubet
 noctu insanire, curitare, amicam in-
 visere, in olenti fornice inter prosti-
 bulas noctem insomnem ducere. Illic
 scorto putidissimo inserviendum est,
 iubet, parendum: vetat, æque pa-
 rendum, eiicit abeundum: revocat

redeundum. An non tibi ista servitus
& quidem maxime pudenda videtur?
Quæ vero homini cupido libertas?
Libet domi vivere, sic iussit inertia.
Num continuo licet? Si quidem istuc
finet domina cupiditas? Siccine (in-
quit) agis ignave? Cessas? Non vi-
des quantum lucri facturus sis, si iam
merces in Angliam traieceris? Age
accingere, navigandum est, en tibi
venti secundi. Tu certe, ut heræ iussa
peragas, per totas hyemes terra ma-
rique cursitas, tempestatum, coniu-
iugis, natorum, vitæ postremo se-
curus. Hoccine est tandem liberum
vivere? Itidem de singulis vitiis, pro-
bandi ratio sumi potest. Verum iam-
dudum odiosam esse loquacitatem
meam sentio, ad cetera veniendū sed
si prius generatim docuerimus, qui
sceleratus sit liberum esse neminem.
Nunquamne turpitudinis tuæ pudet
pigetque? Et sæpenumero credo.
Quis enim usque adeo perditus est,
qui nunquam in se redeat, perspecta-
que fœditate sua vel supplicii metu
vel virtutis amore mutari cupiat? Ita
est

est, inquires, qui pugno aliquoties à perditis moribus recedere, sed iam abire parantem, nescio qua violentia, peccandi consuetudo remoratur, ac vel invitum ad pristina studia redegit. Recte vero narras. Quid? Sentisne igitur te captum esse miser? Tandemne intelligis, te servum esse vitiis? Ubi senserint te à se desciscere parantem iam fugam meditari, manus tibi iniiciunt, atque uti servum compedibus vinctum pistrino (ut ita dixerim) dedunt. I nunc demens, & libertatem tuam nobis iactita, cui seculo, cui coniugi, cui fortunæ, libidini, cupiditati, ambitioni, cui denique diabolo ipsi serviendum est, adeo ut iam cum Syro illo Terentiano merito dixeris (nisi quod ille fecte, tu ex animo) scire cupio quot mihi sint domini. Porro ut scite noster scripsit Hegius. Servire multis fortis est miserrimæ. Quid ego nunc tibi nostram libertatem commemorarem? An non singularis libertatis videtur extra fortunæ (si qua est) ditio- nem vivere, eam neque acerbam metuere,

tuere; neque optare secundam: ad-
 versa non frangi, fausta nihilo fieri
 insolentior? Audemus illi cum
 Democrito mandare laqueum (ut
 apud Iuvenalem est) mediumque un-
 guem ostendere. Nihil illi in nos iuris
 est. Rerum cupiditatem una cum re-
 bus ipsis abieciimus, imo Deo scœne-
 ravimus. Quid si vitam adimat? No-
 bis quidem præter turpitudinem ni-
 hil acerbum accidere posse persua-
 sum est. Mors vero iis metuenda est,
 qui turpiter vixere. Bonis certe non
 modo non metuenda, verumetiam
 optanda est, utpote quæ eos hinc in
 feliciorē vitam deducat, præterea
 ferream illam, imo adamantinam se-
 cularium negotiorum catenam abru-
 pimus, ac molestissima sarcina levati
 cœlo ferentes animum, quicquid hu-
 mi geritur nihil nostra interesse iu-
 dicamus. Quare quid potest esse li-
 berius? Postremo durissimum illud
 Pharaonis teterrimi iugum, Deo opi-
 tulante, excussimus: improbiſſimis
 Dominis vitiis dico, parere desivi-
 mus, non ita quidem, ut nihil un-
 quam

quam peccemus, quod haud scio an nemini mortalium in vita contigerit, sed ut miles is plurimum sibi laudis victorisque nomen, è certamine merito suo ferre potest, qui consertis cominus dextris naviter dimicans, non sine vulneribus quidem suis, sed tamen hostem aut capit, aut iugulat: contra vero victus iudicaretur, si etiam citra vulnera, & salva cute se capi, atque in servitutem abduci pateretur: ita nobis, si quando evenerit, quod, ut dixi, ab homine præstari fere nequit, quid nostra refert, si nonnihil labamur, certe vincimus, certe libertatem, certe vitam tutamur. Quid quod ii qui in prælio fortiter egerint, resecto pectore etiã cicatrices suas ostentare solent, aut spiculis, ita ut forte excepta sunt in corpore relictis, in castra seu in urbem spectandi redire, id decorum maxime adbitrantes, si pro patriæ, suæque salute tuenda, quam maximâ vulnera excepisse intelligantur? Præstat profecto se invicem, ac victorem in castra referri, quam incolumem (si quidem

64 ERASMI ROTER. DE
quidē id detur) quā hosti dedititium
vivere. Quisquis autem vitiis se dedi-
dit, hosti dedititius vivit. At quali
hosti? Quo nemo sit turpior, nemo
immanior, nemo capitalior, qui no-
stræ mortis quam suæ vitæ sit avi-
dior. Et quid possit esse homini ma-
gis pudendum, aut quid hominis di-
gnitate indignius, quam diabolum
tam fœdum ferre dominum, eo con-
tempto cui & se & sua omnia debeat?
Præsertim cum huic servire summa
sit libertas, atque adeo sola. Quare
si quem servilis illius libertatis iam
tædium cœpit; huiusque liberrimæ
servitutis desiderium, hic hic quæ-
rendam noverit, Nam quum illi ser-
vire una sit libertas (ut diximus) id
autem ita ut in secessu nusquam licet
nusquam tanta libertas.

C A P. X.

*Solitarios duplici tranquillitate
gaudere.*

TRanquillitatem vero quis di-
gne commemorarit? Non hic
inque-

inquietus ille mundi fragor obstre-
 pit, quid enim istic non plenum fre-
 mitu, plenum tumultus? Hic lachry-
 mat, ille rider, hic queritur, ille liti-
 gat, hic salutat, ille nunciat, alius
 vocat, itur, reditur, clamatur, dis-
 curritur, quocunque aspexeris, quo-
 quo te verteris, quietum nihil, nihil
 non clamosum offendes, ita ut in
 turbulentissimo aliquo freto versari
 possis videri. Et quando inter ista li-
 ceat animum componere? Quis in
 tam varia rerum facie possit secum
 constare, secum vivere? Quid in tur-
 bine isto divinus hominis animus
 possit se dignum, aut cogitare, aut
 agere? At quid fiat ut sponsum suum
 fores pectoris pulsantem sentiat, al-
 loquentisve vocem audiat anima
 iam facta perpetuo atque immodico
 fremitu surdastra. Profecto non in
 urbe, sed in monte, non in curia, sed
 in spelunca, non in petras conterente
 turbine, non in commotione, non
 denique in igne, sed in auræ tenuis
 levi sibilo Helias dominum, sensit
 adesse. Quod si sacras historias evol-
 vere

vere vacet, videre fuerit maxima
quæque divinarum rerum miracula,
non in turba gesta esse, sed in recessi-
bus. Ubi enim Mosi arcanum illud
rubi flamma innocua flagrantis por-
tentum exhibitum legis? Num in Æ-
gyptiis urbibus? Minime. Nam tum
illinc tyranni metu profugerat, ve-
rum ad montem Dei penetrata prius
vastissima atque altissima sylva. Ne-
que fumantia tecta, sed deserta vi-
rentia incolentibus manna depluit.
Ubi vero divina illa ferendæ legis
pompa acta est, quum è densissima
caligine fulminibus subinde celeri
flamma emicantibus, mugiente to-
nitru cœlestes buccinæ horrendum
interstreperent? Nempe in Synai
montis vertice, vulgo procul absi-
stere iusso. Et olim prophetarum fi-
lios prophetas utique futuros tecto-
rum odio Iordanis ripas habitasse
accepimus. Ioannes homine maior,
utpote angelus domini vocatus, ubi
quæso cœlestem ac purissimam vi-
tam exegit? Ubi divina arcana edo-
ctus est, ut dissimulatum homine
Deum

CONTEMPTU MUNDI. 67

Deum digito monstrare non dubitaverit? Profecto non in patriis ædibus sed in eremo. Quid quod & dominum ipsum Iesum quasi turbarum fastidio secessus sæpenumero captasse videmus. In montibus quoties docuisse legitur. In desertis item, in littoribus quoque quoties quam admiranda gessisse, in curandis morbis, in corrigendis quum corporum, tum animorum vitiis, in exturbandis teterrimis spiritibus, in explendis convivis tam multis tam paucis epulis. Ieiunaturus ab hominum conspectibus desertis locis abdidit sese. In monte gratissima illa visio tribus Apostolis exhibita est. Crepusculo eius noctis, qua capi se passus est, Christus orandi gratia in hortulos secessit. Ipse est qui nos quoque oraturos in cubiculi secretis abdi iubet. Denique extra mœnia (haud temere certe sed consulto) occisus est, ita ut facile coniicias illum fugitasse tumultus, odisse clamorosa theatra, non amasse strepentia fora, non celebritate ac frequentia delectatum, sed solitudine

68 ERASMI ROTER. DE
litudine gavifum, amicam illi fuisse
tranquillitatem. Quid nunc huma-
na ac leviora commemorem? Pytha-
goram in Idæo antro multa arcana e-
doctum ferunt. Plato academiam
suam philosophiæ colendæ multo A-
thenis iudicavit commodiorē. Poë-
tæ ipsi, nescio quas rupes ac lucos si-
bi finxerunt, in quibus versarentur,
quoties eos divinus ille furor corri-
puisset, hoc significantes, eum qui
aliquod egregium ac venustum car-
men condere cupiat, à turba semo-
tum esse oportere. Postremo (ut ad
vulgus veniamus) videmus fabros
aurifices, pictores, cæterosque arti-
fices quorum opificium aliquid sin-
gularis habet industriæ, quum quid-
dam exactius atque accuratius effi-
cere cupiunt, aliquo fugere, ubi
strepitus hominum ac frequentia la-
borantes non interrurbet. Ex quibus
omnibus liquido intelligi licet, tur-
bam arduum quippiam molientibus
vehementer officere, tranquillitatem
summis gerendis rebus esse oportu-
nam. Quid potest esse magis ar-
duum,

duum, ac serium eo negotio quod ad animæ salutem, ac beate vivendum spectet? Id igitur in mundo haud commode curaveris. Quis enim istic tranquillitati locus? At hic contra mihi lodoce omnia late silent, foris, intus: utrobique summa rebus pax est. Illam quidem gratissimus ipse loci recessus parit, hæc vero de optima atque integerrima mente proficiscitur. Ita autem alterius opem utraque poscit, ut si alterutram detraxeris, neutram reliquisse videaris. Nam & externa illa quies internam fovet, alit, tutatur: at illa vicissim, nisi hæc accesserit, molesta, ociosa, imo perniciofa fuerit. Eum enim qui acerbo atque turbato sit animo poëta solum esse prohibet. Quicquid agis, loca sola nocent, loca sola caveto. Quo fugis? in turba tutior esse potes. Nec præterire queo, tametsi iam prope- randum mihi sentio, percommode enim incidit, nobilem illam Cræteris philosophi exhortationem, qui ut forte adolescentulum quendam, ultro citroque commeantem animad-
vertisset

70 ERASMI ROTER. DE
vertisset solum secum, nescio quid
fixius meditantem, rogabat quid il-
lic rerum ageret. Mecum ait ille lo-
quor. At cave, inquit Crates, ne cum
homine improbo loquaris. Et facete
& breviter uterque. Est igitur lau-
danda solitudo, sed in homine lau-
dato, contra sceleratis nihil pernicio-
sius. Tum enim acerba cogitant, tum
immanissima flagitia concipiunt, tum
& sibi & aliis sæva consilia tractant.
Quid tandem miseros ad acceleran-
dam sibi necem impelleret, nisi com-
moditate sua invitet solitudo? Quis
unquam aut venena bibit, aut laqueo
iugulum fregit, aut ense pectus defo-
dit, aut sese præcipitem dedit, nisi
solus? Quorsum igitur, inquis, lau-
das mihi tantopere solitudinem rem
tam pestiferam? Hic mihi commo-
dius respondero, quam Crateris mo-
do commemoratam sententiam. Tu
cum tecum vivis, cave cum homine
improbo vivas, iã nihil erit quod so-
litudinem metuas. Ita à turba, ut mul-
to amplius à vitiis recedas. Ita fileant
circum te loca, ut non fremant pe-
ctora.

ctora. Quanquam hoc verboso sermone non tibi Timonianam illam solitudinem commendare studui, volo enim te non ex universo hominum genere, ut fecit ille, sed è turba migrare. Verum de externa quiete satis. Iam de interna paucis agendum est quæ uti in mente est, ira non nisi à mente proficiscitur, sed bona, sed nullius sibi flagitii conscia. Tanta enim virtutis vis est, ut cuius in animo confederit, eum incredibili pace quadam tranquillet, ac leniat, omni- que anxietate, horrore, metu, ac perturbatione liberet. Quæ res quanti sit, tum rectius intelliges, si inspi- cias quas angustias, quos tumultus sceleratus animus ferat. Nam qui fur, aut peculator, aut scortator, aut pro- ditor, aut stuprator, aut adulter, alio- qui flagitiosus sit, scelerum conscien- tia premente, in perpetua anxietate ac formidine versatur. Occursant dormienti, occursant vigilanti tan- quam furia quædam horribiles illæ scelerum facies. Ad omnia pallescit, exanimatur, metuit, quum omnia,

tum

72 ERASMI ROTER. DE
tum hæc in primis suspicionem, sermones, infamiam, iudicium, supplicium. Verum fac contemnere, aut certe fallere hominū conscientiam, fac item Deum immortalem non vereri, num quando fieri poterit ut suam ipsius conscientiam effugiat? Nihil profecto minus. Quoquo enim rerum se verterit, quocunque locorum profugerit, dira illa pectoris tormenta non deserunt fugientem, imminet, agitant, territant, non epulas, non lucem, non vitam sinunt esse iucundam, ipsam postremo quietem inquietam efficiunt. Hinc plerumque corporis macies, hinc vultus truculentia, hinc oculorum fœditas, hinc cuiusvis rei metus, quo ipsi sese proderet solent. Quo pulchre & iuste ab æquissimo rerum iudice cōparatum est, ne nulli omnino impune nocentem esse liceat. Nam maleficia fœda quædam suspicio continuo consequi solet. Primum ea abunde nocentem ulciscitur. Deinde sermones atque infamia quæ profecto tantum malum à plerisque

plerisque iudicata sunt, ut è vita migrare, quam his obnoxii vivere maluerint. Verum multi eam malitiæ evasere, ut ista facile contemnant quin esto iuxta vulgi sermonem quantum eis malitiæ, tantum sit & fortunæ, ut ipsis neque postulator quisquam, neque iudex, ex hibeat negotium, erit tamen, erit aliquando qui inexorabili severitate supplicium summat. At ista procul absunt inquit, quasi vere certi sint vel unam se horulam victuros. Verum ut hoc eis concedamus, certe iam nunc præsens intra ipsos supplicium est maleficiorum conscientia, quæ tam acerba est, ut nullum facinus, tantam adferre voluptatem possit ut his cruciatibus emenda sit. Quis enim unquam satis æstimaverit, quam dirus sit ille peccatoris motus, quum seditionem quadam acerrima ipse à sese dissidet animus ac quibusdam partibus suis aliis alio nitentibus concutitur, discerpitur, discinditur accusante memoria, iudicante ratione, puniente conscien-

74 ERASMI ROTER. DE
tia, alio ratione, alio natura, alio
vocante peccati libidine. Unde per-
petui stimuli, perpetuæ rixæ, bellum
perpetuum. Quapropter non absurde
ecclesiastici quidam sensisse iudican-
di sunt, qui conscientia remorsum,
qui malos ad inferos euntes conse-
quitur, eorum suppliciorum quæ il-
lic inveniunt non minimam partem
iudicaverunt. Iuvenal. igitur præ-
clare illa ut omnia. Quir tamen
hos tu

*Evasisse putes, quos diri conscia facti
Mens habet attonitos & surdo verbere
cedit*

*Occultum quatiens animo tortore fla-
gellum?*

*Pœna autem vehemens, & multo se-
vior illis,*

*Quis & Cedicius gravis invenit &
Rhadamanthus.*

*Nocte dieque suum gestare in pectore te-
stem.*

Et post pauca.

*Cado si conata peregit
Perpetua anxietas, nec mensa tempore
cessat* *Fau-*

CONTEMPTU MUNDI. 75
*Faucibus (ut morbo) siccis interque mo-
lares*

Difficili crescente cibo. Et cætera
item verissime atque pulcherrime.
Possent eadem hæc ut ratione atque
auctoritate probati sunt, ita mille
doceri exemplis: at nos (ne singula
prosequamur) tribus contenti eri-
mus, quorum primum ex fabulis, al-
terum ex Romanis historiis, postre-
mum ex sacris literis petemus. Quid
enim aliud sibi vult quod Orestes si-
mul atque matrem trucidasset, ab ul-
tricibus diris (quas vulgatus furias
appellant) correptus fingitur, itaque
ab his exagitatus, ut quocunque fu-
gisset, eas adversas sibi que faces in-
tentantes offenderet, quam eum qui
aliquod flagitium admiserit, ita con-
scientiæ stimulis torqueri agitarique
ut phrenesi quadam laborare videri
possit? Multa quidem scite à poëtis
excogitata sunt, at hoc mea senten-
tia nihil aptius. Quare me huius fa-
bulæ commemoratæ nondum pœni-
tet. Et quid Lucii Syllæ exemplo

evidentius? Fuit huic viro ut legimus, inexpleta crudelitas, ita ut miserabile dictu sit, quot aut proscripserit, aut cædi iusserit, cæteris item sceleribus non segnius ornatus. Verum de hoc tyranno (quod nemo alius poterat) ipsa hominis malitia supplicium sumpsit. Maleficiorum enim suorum conscientia ita excruciatuſ est, ut nullo ingenio, nulla medicorum ope somnum amissum revocare potuerit, tandemque morbo fœdissimo (quem pedicularem vocant) perierit. Restat Chain ille, antiquissimum quidem, at ea re nihilo obscurius huius rei exemplum. Is fratrem invidia permotus trucidasse legitur, neque id impune. Continuo supplicium consecutum est, varium quidem, at nullum inclementius, nullum capitalius, quam conscientia. Ea in sceleris auctorem multo severius quam conditor ipse animadvertit. Obiurgabat ille, imo potius exposculabat, ut pœnitentiam simul & confessionem eliceret: at miser ille
maius

maius peccatum suum existimabat, quam cui ignosceretur. Vitam illi donarat Deus, at ipse se vita iudicabat indignum. Quam durum carnificem in illius pectore sævisse credimus. Quid illi dulce in vita accidere potuisse putes, qui sibi ipse infensus, sui desperans, sibiipsum molestus vitam credebat acerbam, in conspectus hominum prodire verebatur, quippe qui omnes sibi tales fingeret, qualis ipse sibi erat. Vides Idoce mi quæ tormenta, quas labe, quos stimulos, quos tumultus, quos æstus sceleratus animus ferat? Nunc tute collige, quam plena ocii, pacis, voluptatis res sit nihil conscire sibi, nulla pallefcere culpa. Quid est quod peccatus ita præparatum atque compositum permovere possit? Quid est, quod iure metuat? Num homines? Verum non terretur inimico homine qui amico nititur Deo. Num calamitates? At eas etiam lucri loco deputat. An vero mortem quam etiam ultro optat? Postremo an Deum ipsum?

Ne ipsum quidem, utpote cui se & charum, & curæ esse confidit. Quid hac re potest cogitari pacatius, quid securius, quid felicius? Sentiri ut-
cunque Iodoce potest, narrari plane nequit. Num ista tibi levis videtur causa, quur ad nos advoles? At forte ipsum ad quod te advoco iam isthic beatus habes. Sic equidem confido. Sed eo magis tibi isthic evolandum censeo. Habebis enim hic & multo cumulatus & longe tutius. Quid tibi adeo liberum est inter latrones charum portare thesaurum? Hic si quid habes augebitur, isthic æternus metus est ne amittas. Hic interna illa pax maxima, externa nisi hic nusquam. Isthic hæc nulla, illa si qua est, & rara est, & parum tuta, propterea quod cœnobia, ex malis bonos, ex bonis meliores efficiant, mundus contra, ex bonis sceleratos, ex sceleratis sceleratiores reddere consuevit.

CAP. XI.

De Voluptate vitæ solitaria.

VERUM de tranquillitate paucioribus quidem, quam res postularit, pluribus tamen quam institueram egisse video, nunc de voluptate (quod unum restat) quam brevissime poterimus, exponemus. Ea profecto una est, quæ omnes homines tam sibi pertinaciter deditos habet, ut ab ea nullis malis deterreri, nulla ratione avelli possint. Et illud fortasse non absurde Epicurus, errare quidem mortales in iudicandis voluptatibus, omnes tamen uno animo aliis quidem atque aliis modis eas expectere. Proinde seculares (quos vocant) ea vel maxime causa nostræque vitæ institutum fugere atque odisse solent, quod triste putent esse, horridum, inhumanum, atque alienum ab omni voluptate. At nos (ne eos iste deterreat error) longe secus esse demonstrabimus, tantumque abesse, ut vita nostra voluptate vacet, ut

80 ERASMI ROTER. DE
ausim omnes Sardanapalos ad eam
tanquam quendam deliciarum para-
disum invitare. In monasteriis volu-
ptas inquis? Delphinum sylvis appin-
gis, fluctibus aprum. Imo vero mi
Iodocet tota vitæ nostræ ratio Epicu-
rea est. Quid istuc inquis? Audies.
Negat Epicurus eas admittendas esse
voluptates, quas maiores molestiæ
consequantur. Et nos quidem non
scortamur, non adulteramur, non A-
sotorum more nos ingurgitamus: so-
brii orientem, sobrii occidentem so-
lem videmus, quorum utrumque vi-
disse illos negant. Hæc enim omnia
nunquam ita se habent, quin plus ad-
ferant molestiæ quam oblectamenti.
Sed neque ditari, neque clari aliquo
magistratu effici aut possumus aut
cupimus. Ne in his quidem ab Epi-
curi magisterio desciscimus. Nam
cum parum habeant voluptatis, mo-
lestiæ plurimum; sapimus, qui exi-
guum commodum maximo incom-
modo mercari nolumus. Præterea
docet nonnunquam adeundos esse
dolores.

dolores , maiorum dolorum effugiendorum gratia : sæpe omittendas esse voluptates , ut maiores assequamur. Quid nos ? Vigilias , ieiunia , solitudinem , silentium , cæteraque eius generis perferimus , ne maiores dolores ferendi nobis sint. Non potamus uncti , non choreas ducimus , non cursumus quocunque fert libido , non cæteris ineptiis indulgemus , at utinam videas , quanto cum fœnore istis careamus. Tu nos voluptatem amisisse credebas ? commutavimus non amisimus , atque ita quidem ut pro paucis ac parvis plurimas ac maximas receperimus. Iam dudum nitidos istos ac molliculos arrectis esse auribus arbitror , ut qui me novum aliquid parandæ voluptatis artificium docere sperent. Docebo equidem. Sed eos interim à fœdissimis istis illecebris , quæ nobis cum pecudibus communes sunt , animum transferre volo. Pecudes esse desinant , intelligantque , in homine sublimius quiddam esse ac divinius , quo potius

quam ad corpus delectatio referenda sit. Nam pecora cum in illis sit nihil corpore præstantius, suam quandam felicitatem ventris ac inguinis repletionem non iniuria metiuntur. At hominis dignior conditio est, quam ut non aliis rebus, ac bruta natum se existimet. Constat enim ille non corpore modo, verumetiam anima. Corpore quidem excepta figura, nihil à brutis absumus, anima vero non parum ad divinam illam atque æternam naturam accedimus. Corpus terrestre, brutum, tardum, mortale, morbidum, caducum, iners, ignobile. Anima contra cœlestis, subtilis, divina, immortalis, perpetua, lucida, generosa. Et quis sic cæcus est, qui non videat, ne conferendum quidem esse cum anima corpus? Quantum igitur à dignitate animæ abest corpus, tanto animi voluptas corporis præstat illecebris. Illa enim uti anima, vera, perpetua, fastidii nescia, sincera, honesta, divina, salutaris. Hæ contra falsæ, labiles, fastidii

stidii plenæ, plus aloes quam mellis habentes, fœdæ, mortiferæ. Fieri autem nequit, ut idem & corporis & animi voluptate gaudeat. Alterutra carendum est. Quid hic consultus consuleret Epicurus? Nempe ut obscœnas illas corporis illecebras amoveamus, ne impedimento sint, quo minus præstantiores & dulciores animi voluptates assequamur. Atque hoc quidem (ut dixi) est voluptates non amisisse, sed fœnerasse. Sed iam dudum audire te velle suspicor, quibus hic animi pascamur voluptatibus. Primum eo horribili sordidæ conscientiæ cruciatu vacare Epicuro auctore (ne ab eo recedamus) voluptas est vel maxima. Nam illi non parum multum est, quod gaudeat, cui nihil est quod doleat. Deinde cœlestium atque immortalium deliciarum contemplatio, in quas nos venturos Deo volente speramus, an non voluptaria res est? Quis est tam stupido pectore, qui ubi huius vitæ saturo cœlestis felicitas in mentem

venerit, non vel lachrymet præ gaudio, cuius animus sic mœrore deiectus atque humi depressus est, qui cogitata illa vita non erigatur, non exhilaretur, non ex hoc corpusculo evolare gestiat? Quid si etiam gustata? Quanquam hæc nondum sapiunt, quibus adhuc mundus sapit, sacris animis nihil exploratius. Nam quamvis vitæ illius iucunditas futuro ævo servata prius percipi nequeant, quam animus ex hoc teterrimo carcere emergens eo revolvat unde profectus est, eius tamen odore quodam sensuque piæ mentes afflari mihi videntur, & quasi cœlestium imbrium rore quodam tingi, ac de illa nunquam defectura luce nescio quid sublustre aspicere. Quæ res, quid habeat voluptatis, ei cui comperta non sit ne persuaderi quidem potest, experitis non æstimari nedum narrari. Quamquam autem harum deliciarum rara (ut inquit Bernardus) hora & brevis soleat esse mora, tantæ certe sunt ut si quicquid hic mundus usquam
habet

CONTEMPTU MUNDI. 85

habet voluptatis in unum confletur, præ his vile quiddam fastidiendumque videatur. Quod si bene gestorum nulla alia essent speranda præmia (quod multo secus est) certe hac una mercede quosvis perferre labores nunquam me pigeret, dignasque iudicarem, quarum potiundarum gratia cæteras illecebras omnes non solum contemnerem, verum etiam bellum eis indicerem. Age igitur quanti futuram arbitramur illorum gaudiorum copiam, quando sic odor tenuissimus delectat, sic recreat, sic afficit? Quam voluptarium erit, divino illo lumine (quod nisi purgatissimis oculis videri nequit) perlustrari, ita ut ipsi quoque toti pelluceamus, quum tantum adferat voluptatis nebulam (ut ita dixerim) sublucidam idque raptim suspicere? Hæc meditari, res est voluptatis plenissima. Præterea dulcedo illa, qua spiritus ille paraclerus, id est, consolator candidissima pectora quoties secretius illabitur afficit, quoties in
thala-

86 ERASMI ROTER. DE
thalamo castissimo sponfam sui amo-
re languidam sponfus amplectitur,
ac querulam, ut sunt omnes qui mi-
sere amant, blandissima quadam ac a-
mica familiaritate consolatur, dulce-
do inquam illa quid à me comme-
moretur? Narrent qui norint. No-
runt autem & quidem feliciter qui-
bus licuit experiri, ego ad has admit-
ti delicias nondum meritus sum, aut
si quid tenuiter libavi, malo de aliis,
quam de meipso dicere. Et hoc cer-
tius, illud tamen molestius. Eos igitur
persæpe cum lachrymis fatentes
audivi, istas seculi voluptates, quam
vanis hominibus vitio palati sapiunt,
ita sibi videri insipidas, ut non solum
à rebus ipsis animus, verumetiam à
commemoratione aures abhorreant.
Nimirum sorduerunt glandes, ubi
Cereris usus repertus est: fastidire
ceperunt falsas delicias, ubi veras ge-
starunt. At heu plerique mundi cul-
tores ex illo agresti & stolido homi-
num genere, porcinis istis pabulis ita
fauces habent imbutas, ut eis præter
suas

suas glandes sapiat nihil, nec plane intelligunt, quæ possit esse vitæ iucunditas, aut cur in vita morandum sit, sublatis glandibus; id est ventris ac faucium voluptate. Proinde quoties fit ut nos videant in his laboribus (ut ipsi æstimant) in quibus se vivere quidem posse credunt, hilariores aut etiam corpore habitiores vivere quam ipsi inter suas epulas vivant, admirari maximopere solent, nec intelligere possunt, posteaquam carnis delectamenta reiecimus, qua ex re ullam præterea voluptatē capere possimus. Vident adolescentulos teneros, puellas item delicatas, vident annos, vident formam, qua indulgentia paulo ante educati sunt meminere, altera ex parte si quid hæc vita asperum, si quid triste habet collocant, solitudinem, laborem, vigilias, inedias, & id genus cætera. Vident non modo liberum eis esse ab hoc vitæ genere recedere, verum etiam admirabili quadam parentum atque amicorum improbitate suaderi, moneri,

88 ERASMI ROTER. DE
moneri, rogari, impelli, illos con-
tra multo pertinacius obfistere, ma-
trem lachrymantem siccis consolari
oculis, sororem colla stringentem
contemnere, à charissimis sodalibus,
à quibus nuper unum diem abesse
durum erat, nunc omni vita tam fa-
cile avelli, denique tanta hilaritate
supremum valedicere, tanta alacrita-
te suprema dividere oscula, ut nemo
vel alienus inter hæc lachrymas te-
nere possit. Libet hic meminisse
(quæ sone molestum sit) lachrymabi-
lis illius cœnæ, quæ Margaretæ vir-
gini optimæ, mihi sororis loco sem-
per dilectæ cum parentibus suis fuit
suprema. Aderam ipse, & mecum
una plurimi, quos filia eo convenire
dederat operam, ut nobis advocatis
patrem exoraret, quod iam sex an-
nos frustra oraverat, ut monacham
fieri sineret. Matris enim iam expu-
gnaverat animum, neque enim alter-
utrius difficultas ullo vitio accidit.
Sunt enim utrique ut loco, ut specie
apud suos facile primi, ita ea virtute,
ut (quod

CONTEMPTU MUNDI. 89
ut (quod felicitati rarum est) nemo
non amet , non prædicet. Verum ita
in liberos propensi, ut tanquam ada-
ment sic ament. Cœpimus itaque ur-
gere primis animum. Quid multa ?
ille partim pudore, partim filiæ com-
miseratione, partim nostram impro-
bitate victus annuit. Tum vero vi-
disses miserabile subito oriri specta-
culum. Pater filiam complexus ita in-
ter oscula lachrymari cœpit , ac si
continuo in sepulchrū ponenda fuif-
set. Mater exanimata dolore collabi-
tur. Frater adolescens, qui illi erat
unicus , ac germana natu grandior,
alter ætatis, alter sexus imbecillita-
te, eiulatus addentes lachrymis, fo-
rorem communem utrique amplexi,
per has inquirunt lachrymas, per, si
quid potest, fraternā ac sororiā pieta-
tē oramus, ne nos deseras miseros, ne
una utrosque perdas. Cæteri amici
alii flere taciti, alii precari, alii sua-
dere, alii increpitare at siccis genis ne-
mo omnium. Nos porro qui filiæ ve-
neramus advocati cum omnium tum
patris

90 ERASMI ROTER. DE
patris lamentis ac lachrymis permoti, quæ illi viro gravissimo ut puero cadebant ex oculis, & ipsi lachrymari cœpimus, id quod cum nostro dedecore dicimus. Iam prope pœnitebat tantas turbas concitasse. Quid inter hæc ageret virguncula, sexu, ætate, natura mollis, educatione delicata? Paulus ipse valedicturus, fratrum lachrymis se & si non permotum, at motum certe significat. Quid inquit facitis flentes, & conturbantes cor meum? Verum hæc (tametsi insigni in parentes esset pietate) oculis siccis, vultu sereno patri blandiens negat esse causam cur se excruciet, iustius gaudendum esse, ut qui gnatam non amissurus, sed habiturus sit, quæ pro se Deum oret. Matris item ægrotum animum ac cæterorum osculis, precibus, monitis, lenire sedulo studet. Frustra, nam perpetuum hoc convivium usque in seram noctem singultibus, lachrymis, questibus productum est, una hilari Margareta. Hæc itaque quoties
vident

vident (nam fit nonnunquam ut videant) ii qui, ut dixi, fere non nisi palato sapiunt, conlachrymant sæpe etiam ipsi, admirantur robur animorum iuvenilium, atque iam suæ molitiei supputet. Verum quid suspicantur? Nunc censent eos annos, eos vultus, ea corpora, eos animos tam facile posse abduci, imo tam averfari seculi voluptates, nisi repperissent iâ potiores? Num ad eos labores tanta magnanimitate contenderent, ni dulces experti essent? Sic est mi Iodoce, sic plane est, dulce est expertis, quod etiam acerbum ac durum inexpertis viderur. Verum quando hoc istis persuaseris? Vident enim, ut ait Bernardus, cruces nostras, unctiones non vident. Cupio equidem illis mentem meliorem dari, nisi tamen ipsi grato errore libenter insaniunt, quemadmodum Argivus ille apud Flaccum. At tibi, (quando ab eo non multum absumus) plane persuadere volumus. O si optando assequi liceret, ut sicut sub aspectus tuos, hæ venturæ sunt
lite-

92 ERASMI ROTER. DE
literæ, ita in animum tuum ani-
mi nostri transfundantur affectus, id
est, ut tu sic afficiare legens quomo-
do ego scribens afficior. Iam hic epi-
istolæ finem ponerem nec in persua-
dendo plus sermonis terendum esse
iudicarem. Ad id quando frustra for-
tassis optamus, & ad persuadendum
nostram non valet auctoritas, unum
in medium adducam Hieronymum,
quem & vita gravem, & eruditio fe-
cit insignem. Dic quæso virorum san-
ctissime, quid tu in ista horrenti so-
litudine, immodica confectus ine-
dia, vigiliis prope perpetuis macera-
tus, tantis laboribus attritus nullam
ne habes vitæ iucunditatem? O quo-
ties inquit, in eremo constitutus in
vasta illa solitudine, quæ exusta solis
ardoribus horridum monachis præ-
stat habitaculum, putavi me Roma-
nis interesse delitiis. Et ut mihi testis
est dominus, post multas lachrymas,
post cælo oculos hærentes, nonnun-
quam mihi videbar interesse agmini-
bus angelorum, & lætus gaudensque
canta-

cantabam. Post te in odorē unguentorum tuorum curremus. Audisti Iodoco confitentem? liceret quidem & alios citare testes, verum aut huic aut nemini credemus. Atque hæc quidem voluptas omnibus piis communis est. Est tamen præterea quædam viris eruditis peculiaris, qua fruuntur, quoties aut probatissimorum auctorum scripta legunt, aut ipsi legenda scribunt, aut lecta animo volunt. Hoc voluptatis genus tanta habet varietatem, tantam copiam, ut nullus omnino fastidio possit esse locus. Quid enim? Si quid ex ipsis fontibus libet, utriusque testamenti volumina petuntur. Si veritas per se honesta eloquentiæ nitore honestior facta delectat, ad Hieronymum, Augustinum, Ambrosium, Cyprianum atque eiusmodi curritur. Si paulo fastidientior Christianum Ciceronem audiendi libido est, Lactant. Firmianus in sinum ponitur. Sin neglectior apparatus ac sobria cœna delectat, Thomæ Alberti ac similium libri sumuntur

muntur in manibus. Quod si à vere-
ribus illis amicis abesse perpetuo ne-
quis, licebit quidem & istos inter-
dum revifere, ubi ocium erit, at ita
ut rivalem te non convictorem exhi-
beas. Est enim apud istos mulier illa
barbata, sed vultu honestissimo,
quam tu raptam ubi capillos unguet-
que fecueris, ex scorto tibi legiti-
mam coniugem facies. Habes igitur
arcanæ ac multæ sacræ scripturæ
volumina, habes monumenta pro-
phetarum, apostolorum, interpre-
tum, doctorū, habes philosophorum
ac poëtarum scripta, non ei fugien-
da, qui novit in aconita salubres her-
bas legere. Quid? Inter hæc summo
ocio, summa libertate, vacuum curis
versari an non id est deliciarum para-
disum incolere? Quis in tanta va-
rietate fastidio locus? Quid hic non
voluptatis plenum? Quam læto gra-
mine campi virent, quam blanda flo-
rum varietate picta nitent gramina,
hinc rosis formose rubentibus, hinc
niveis liliis placide candentibus,
hin

hinc purpureis violis arridentibus,
 hinc fulvis thymis suave spirantibus,
 nec desunt formosa nemora comis
 luxuriantibus umbram gratissimam
 texentia, qua meridianos æstus de-
 fendamus. Adde arborum genus in-
 numerum, fructuum ferax sapore
 dulcium, atque (quod pluris est) sa-
 lubrium. Has iuxta liquidissimus il-
 le amnis dulci murmure labitur irri-
 gans omnia, ille inquam amnis pro-
 fundissimus, quem superari non pos-
 se demiratur propheta. In his amœ-
 nissimis pomariis spaciari, errare, at-
 que (ut ita dicam) lascivire quoties
 libet licet. Quid tale vestræ habent
 choreæ? quid popinæ, quid balnea?
 Ad hæc te Iodoce ut hominem & e-
 ruditum & studiosum voco. Ad hæc
 te ut amicissimum invito. An quic-
 quam postea est, quod te istic remo-
 rari, aut hinc deterrere possit? Ha-
 bes quam mortiferæ quam etiam a-
 cerbæ sint mundi illecebræ, quæ (ut
 ait Seneca) ad hoc nos amplexantur,
 ut strangulent. Opes item quam nihil
 habeant

96 ERASMI ROTER. DE
habeant boni, nihil solidi audisti. De
honoribus in quas calamitates homi-
nem præcipitent satis (ut arbitror)
demonstratum est. Præterea de mor-
tis inexorabili necessitate adiectum
est. Postremo ista vita quam plena
discriminis, quibus sit ærumnis ob-
noxia commemoravimus. Inunc &
contare utrum in istis malis hære-
re, an ab istis evolare malis. Contra hæc
nihilominus, qua libertate, qua tran-
quillitate, qua voluptate, qua spe hic
vivatur accepisti, & nondum etiam
advolas? Adhuc hæres, adhuc te-
cum deliberas, adhuc cunctaris Ae-
gypto suas carniū ollas relinquere,
ut manna te pascat eremus? At du-
rum est inquis à charissimorum con-
suetudine distrahi, amicorum per-
vincere affectus. Eia Iodoce durum
vocas, vide ne tu mollis potius sis.
Cave ne pueri ac puellæ, quibus ista
res minime dura visa est, his tibi ver-
bis insultent. Tu negas te posse, quod
nos potuimus. Et quo tibi barba,
quo viri nomen, quo anni, quo eru-
ditio?

ditio ? Tu vero tibi persuadeis amicis nihil esse inimicius , qui salutem tuā aut impedire , aut remorari moliantur. Qui si errore peccant , aut amore insaniunt , num tu cupis una cum eis insanire ? Si consulto , atque prudentes officiunt , qui amici iudicandi sunt , cum tibi non optime cupiant ? Sed in carne inquis angelum agere , humanis maius est viribus. Postremo non licere hominem suo more vivere , sed omnia ex aliena sententia , vel potius libidine agere , dictu est quam factu proclivius. Istud quidem non abnuo , neque enim me latet militiam esse vitam hominis super terram. Sed si quid negotii est , id omne propemodum in ipso tenendæ rei aggressu consistit , quem si strenue perumperis , evasisti. Iam olim vulgo dicunt. Is medium opus confecit qui recte cœpit. At hic certe , cœpisse , prope admodum perfecisse est. Sed primi te terrent aditus. Habeo quo istam tibi trepidationem eximam. Aegre ab seculi voluptati-

98 ERASMI ROTER. DE
bus avelleris, æternas delicias cogi-
ta. Nostrum institutum triste ac du-
rum videtur, perpetuos cruciatus a-
spice. Nihil te cruciabit quo perpe-
tuos effugias cruciatus, nihil volu-
ptarium erit, quo cœlestes volupta-
tes amittas. Postremo nihil erit ar-
duum quod sibi vehementer impera-
rit animus, nihil desperandum quod
opitulante Christo moliaris.

C A P. XII.

IAm dudum video te componere
sarcinas, induere talaria, quo mox
ad nos accurras. Verum ne nimium
calidum hoc sit, paucis etiam mihi
præmonendus es, ne tibi veniat usu,
quod hodie multis videmus accide-
re, quos ideo pœniter suscepti insti-
tuti nostri, quod in hunc veluti pu-
teum, unde reditus non est, non de-
scendunt, sed præcipitant sese. Ad
Christi professionem nemo cogitur,
sed ab hoc nunquam resiliendum, si-
ne quo nulla omnino salutis spes. Cæ-
terum

terum in reliquis vitæ institutis, quæ pro tempore reperiunt homines, quando tanta est corporum atque animorum varietas, tanta rerum humanarum omnium mutatio, fortassis non expedit quenquam sic astringi, ut referre pedem non liceat, modo quod mutatur magis faciat ad illius qui mutat salutem. At quando aliter visum est his, quorum arbitrio gubernatur mundus, hoc circumspicius est aggrediendum negocium, quod semel aggresso liberum non sit mutare quod instituit. Olim monasteria nihil aliud erant, quam secessus quidam bonorum virorum, qui vel tædio voluptatum ac vitiorum, quibus id temporis hoc magis erat contaminata vita mortalium, quod adhuc promiscue viverent ethnici cum Christianis, vel offensi sævitia persecutionum, relictis urbibus, in invios montes se subducebant, evangelicam quandam vitam meditantes. Cultu vili, victu tenui, quem facile quævis terra suppeditabat, qui-

100 ERASMI ROTER. DE
bus omne tempus aut sacris hymnis,
aut sanctæ lectioni aut cœlestibus
colloquiis, aut piis precibus, aut cha-
ritatis officiis, quibus ægroti aut ho-
spites refocillabantur innoxios ope-
ris, quibus egentes sublevabantur
dabatur. Nec aliud tum erat mona-
chus, quam pure Christianus. Nec
aliud monasterium, quam grex ul-
tro conspirans in purissimam Christi
doctrinam. Aberat imperium, ultro
prævolabant omnes, & freno magis
erat opus quam calcaribus. Extre-
mum illis supplicium erat, amica
fraternaue correptio. Nunc plera-
que monasteria mediis mundi visce-
bus admixta sunt, nec aliter extra
mundum sunt quam renes extra cor-
pus animantis. In quibus adeo non
viget disciplina religionis, ut nihil a-
liud sint quam scholæ impietatis qui-
bus ne liceat quidem esse puros & in-
tegrus. Quibus titulus cultusque re-
ligionis, nihil aliud præstat, quam
ut impunitius liceat quicquid libet.
Et quarum prudentiæ mundus non
credebat

credebat suas culinas, his creditur, imo perditur ecclesiæ negocium. Est autem & interea, in quibus viget religionis disciplina, nonnihil discriminis. Aliud vitæ institutum aliis atque aliis magis congruit. Prius igitur te ipsum explores oportet, ut tibi notus, iudicio deligas vitæ rationem non ignotam, & iuxta Pauli doctrinam omnia probes, quod bonum est tibi teneas. Bona pars hominum, non ob aliud suscipit religionis professionem quam ut vivat commodius, ventri suo consulens, non animo. Itaque quos in mundo frugalitatem & industriam docebat inopia rei familiaris, ii in monasteriis ocio luxuique indulgent. Quique in mundo tenues erant & humiles, in paupertates professione satraparum ac regum luxum strepitumque imitantur. Et quibus unica uxore contentis ferenda fuerant incommoda matrimonii, nunc gratis ac licenter volutantur per omnia stupri genera. Quosque prius legum publicarum ac magistratuum metus co-

hercebat à flagitiis, hoc præstat cuculla titulusque religionis, ut exempti à ditione episcopi ac magistratum peccent licentius. Ita ficta paupertatis professione paupertatem efugiant, ficta castitatis professione libidini suæ consulunt, ficta obedientiæ professione perficiunt, ne cui cogantur obedire. Denique sunt quos casus aliquis coniicit in hoc vitæ genus, alium quia puella vehementer ambita potiri non contigerit, alium quia in tempestate, morbo, aliove periculo metu perculsus, tale quippiam voverit. Nonnullos sodalis ante charus pertrahit ad vitæ consortium. Quidam improbis hortatibus, veluti bubali naribus pertrahuntur in foveam, Quidam etiam huc protruduntur à parentibus impiis, aut tutoribus, quo se sumptu curaque levent, ii potissimum insidiantur ætati simplici, cuique facile imponitur. Ego vero in totum dissuaserim, ne rudis ætas involvatur instituto unde non possit explicari. Mature oportet esse
Chri-

CONTEMPTU MUNDI. 103
Christianum , sero monachum,
quanquam abunde monachus est
quisquis pure Christianus est. Ne-
que pauci sunt , quos superstitio, aut
etiam stultitia deducit in monaste-
rium ignaros quibus in rebus sita sit
vera religio, ac pulchre sibi monachi
videntur, si cingulum aut cucullam
gesserint. Hos si conspicias sceleratio-
res esse in professione religionis,
quam fuerint in vita priorē, mirum
videri non debet. Itaque tu mi Iodo-
ce simul ac cognoris quid sit vera re-
ligio, ubi tuum ingenium, corpus &
animum exploraris, ubi genus vitæ
dispexeris tuis rebus accommodum,
ubi nactus fueris sodalitiū, quod
unanimitē conspirarit in Christum,
eo te conferas, sed domi relictis o-
mnibus huius mundi cupiditatibus.
Alioqui frustra mundum reliqueris,
si mundum tecum in ipsum attuleris
monasterium, nihil omnino tecum
efferas Aegyptiarum deliciarum, si
properas ad terram lacte ac melle
manantem. Multi se credunt Anto-
nios

nios ac Paulos esse, qui non scortantur, non saltant, non inebriantur, cum toti madeant intus, odio, livore, cum scateant obtreptione ac virulentia linguæ, cum omni fastu rugeant, cum morosi sint & intractabiles, cum sui sint amantes, cum sui compendii gratia palam adulentur principibus, scientesque ac prudentes sinant Christi gloriam obliterari quo suæ gloriæ consulant. Infame crimen est incestus quanquam isti nec ab his absunt vitiis, sed hæc adulatio superat sexcentos incestus, & huius perniciës latissimè patet in universum genus mortalium. Iam fortasse mihi dices, tibi displicere monasteria omnia, nec usquam reperiri apud hos gregem qui synceris animis conspirant in Christum, Proinde tu sic mundum fac relinquant, ut innocentissimis quibusque te adiungas, & in monasterio te esse puta ubicunque versaberis inter eos qui veritatem, qui pudicitiam, qui sobrietatem, qui modestiam amant, qui crepant, qui moribus